


文莊集

夏竦



文莊集原序

繇文章取賢科位宰執流風遺烈光華休暢在漢有之
公孫李以慎厚而飾儒雅通于治道在唐有之裴寬中
以峻整而持法度協于柄用在本朝有之鄭國文莊夏
公以哲艾而經文武穆于矢綽是皆為當世偉人表的
於後公厚昂之精降崧之靈洞九流之指歸漱六藝之
腴潤年甫及冠業已大成于時章聖皇帝罷兵和戎留
好典籍物色遺逸寤寐駿良始闢六科親策多士公試



三千言於政事堂遂敷秘廷對清問天子擢以優等聲
光四馳褒渥有加方朝家擁瑞物興禮文忝夷丙之御
訪鬼神之本公番直儒館屢賜延見形容上德時奏賦
頌洎通衡石之學數夸美於丞輔會詔諸儒輯君臣故
事分釐部類公譔別序為多復預編修國書仁廟啓藩
在潛命公傳以經義兼筦牋記極一時之選乃陟詞掖
入禁林鼓動雷風藻澤謨訓朝廷大典冊多屬於公公
亦感慨榮遇攄發淵蘊及毗宰政建言復制舉以取宏
博之彥復百官轉對以通下情置理檢使以達寃滯時
論翕然又以三長之筆克就信史及退釋重任服在大
僚寶元中種羌畔換西鄙不靖公以兼備之材簽棟素
定擁旄推轂付以專閫既而起居兵間以新書李法從
事嘗奏議邊十策多蒙施用經畧懷來卒柔異俗於是
佩相印冠樞廷荒大國之封峻常伯之秩雖寵靈綢繆
而益懷驚畏學士楊公察草麻制謂仲尼不容周公胥
怨豈得其時而未盡其志耶然恒赫隆盛彌四十年以

文致身稽古之力其極矣哉自公出處中外勤勞王家
大編鉅軸襞積私楮歲月其逝弗皇綴緝紙蠹墨蟻頗
有墜逸公既薨而嗣子亦謝世元孫尚書比部郎中伯
孫諉故吏工部郎中張君宗益秘閣校理裴君煜彙次
遺集成百通後數載見俾序之公嘗論文以氣骨為主
詆時輩所作如繡屏焉於書無所弗通以至陰陽律歷
隸古之學莫不兼總以為天下之樂無如黃卷中也屬
思深湛構辭緻密此翰就簡竄塗不已歸於至當乃可
尤善章奏鋪賦顛末言詳意盡蓋會粹衆說而掇其真
粹包括曩製而豐其條幹如至音純繹金石奏於宗廟
華采煥爛黼黻施於象服後之學者鑽仰之範模之景
山學海可得致歎宋敏求謹序

有宋文莊夏公挺生于祖宗朝其文溫厚謹嚴發乎性
情而動有典則如文靖李公文正王公之在朝一時化
之風聲氣俗訖無叔季澆醜之習其間琢句警聯嘉言
讜議膾炙人口至今不絕而尤工於表章制誥雖使琳

瑀常楊復生未易遽出其右信矣文章之與時俱高也
邈游學時得公牋表一通於都市固已玩之有日常恨
未睹其全比倅江夏遇湖北漕使直閣公之宗支也適
兼郡印蓋嘗從容語及遂蒙出其家藏凡百卷以示因
付鏤工以廣其傳工既告畢於是屬邈序之邈常竊笑
文人之裔秘其家集為私淑之計一遭變故已亦不能
有之或覆見有於人甚者灰於劫火靡有孑遺卒之其
先無傳焉使聞茲舉顏其厚矣迺不辭而僭書之紹興
庚申上巳左奉議郎權通判鄂州軍州兼管內勸農營
田事江邈謹序

欽定四庫全書

文莊集卷一

宋夏竦撰



制

兵部侍郎趙安仁可尚書右丞制

勅國家祖功宗德丕顯於大猷廣記脩言允資於實學
屬成書而奏御宜加等以推恩具官趙某性尚淑均儀
操溫重有淳正之德服於搢紳有雅奧之文表於臺閣
自頃叅朝政首譔信書屢易歲時脩觀良直况宣明於

先烈宜峻異於寵章時進秩于中臺實陞榮於右轄肅
茲六職更勵乃誠可

左諫議大夫充集賢院學士孫僅可給事中餘
如故制

勅國家覃慶汾睢逮茲六稔庶官考績咸叙其勞眷乃
侍臣宜加寵異具官某瓌行明識成於夙齡麗藻清規
冠我時彥而自諫垣引籍僊殿兼榮于彼藩宣奏課而
連最審茲邦憲處法以甚平績用居多歲月滋久俾擢
居於瑣闥用特聳於朝榮往踐厥官更圖來效可

樞密直學士右諫議大夫任中正可給事中餘
依舊制

勅汾睢均慶積有歲時考課最於官司已陟明於群吏
眷繁劇於京府宜䟽寵於侍臣具官某學識該通器致
宏遠積純粹之性懷幹裕之材而自入直樞廷兼榮諫
省藩宣巨屏惠撫於黎蒸尹正中畿肅清於豪右惟積
勞之茲久宜信賞之有加特進秩於瑣闥俾增崇於密

侍荷茲寵異無怠乃誠可

右諫議大夫叅知政事魯宗道可給事中餘如
故制

勅朕紹隆景業大庇中區實賴股肱之臣變和天地之
道務在尊寵式表眷懷具官某神稟嶽靈氣載絃直文
章雅正道藝深明方重敢言忠厚無間簡自先聖輔予
冲人不吐剛而茹柔常疾非而甄善倡率群后翊贊正
司洽茲重熙莫匪嘉績宜升勞於瑣闥示嘉寵於黃扉
更賴畫規奉若時命可

翰林學士左司郎中知制誥李維可中書舍人
餘依舊制

勅國家五壇布慶六載于茲庶位陟明久從於鈞校近
臣凝績特舉於徽章以爾具官某瑞世明姿慶門華緒
立言以道無外獎之勤虛已待人有不疲之鑒而自陞
華禁省列職中臺夙夜浚明得大夫之體訓詞深厚合
王者之言而星火屢改於新陽車服靡登於舊數是用

簡自朕意俾圖爾勞宜正秩於綸闈用增榮於密侍膺
茲異選更勵乃誠可

祠部郎中李湘可依前祠部郎中充三司度支
副使制

勅度支之職懋遷有無食足貨通具有前訓故其副貳
尤在得人以爾某勤瘁首公端和毓性頻繁事任履歷
歲時朕昨以洙泗名區真靈所降飲脩靖館慈集鴻禧
方總均輸罄宣懿力宜副版圖之任庸旌幹裕之材更
勵乃誠以稱朕意可

侍御史黃昭益可刑部員外郎充三司戶部副
使制

勅朕觀在昔量能授事地無曠土邑無傲民今之會府
實領其政為之貳者甚難其人以爾某為學該明賚性
溫重而自飛英憲府深行朝倫擢從金穀之司授以藩
宣之寄思慮深遠政治寬平藹然休聲達于朕聽是用
寵以郎選俾贊計臣更務竭誠以答殊獎可

欽定四庫全書
卷一
工部郎中兼侍御史知雜事趙積可依前工部
郎中充三司鹽鐵副使制

勅謹正鐵官修舉鹽筴民不加賦經用益饒必得其人
以貳厥職以爾某操履溫肅志尚端平方面均輸勤勞
於漕事憲臺雜治審克於爰書俾佐計臣必有嘉效勉
思盡瘁以稱朕懷可

太子右贊善大夫監通濟粳米第一倉李明可
殿中丞餘如故制

勅某等國家分命攸司大校羣吏及勞而賞唯恐後焉
以爾等勲蔭起家文辭中選勵精官次率職賓筵善最
有聞考覆斯允或升華中御引籍東朝或述作蘭臺參
丞棘路並為清舉勉稱朝榮可

大理寺丞白波發運判官王直可守殿中丞制
勅某等夫發辰中御畫諾春坊並預通閨尤為妙簡以
爾等藝文秀峙政治寬平連最有聞在勤可紀宜陞朝
著以勵縉紳勉罄乃誠荷茲殊獎可

太子洗馬知陵州軍州事楚用和可殿中丞餘
依舊制

勅某等竭心從政潔已在公積有歲月之勞登於考課
之制中御司衛超進屬丞往欽厥官無忝朝命可

大理寺丞同判永興軍張保雍可殿中丞餘依

舊制

勅某京兆舊區寔屏西夏惠綏之政方倚於忠賢倅貳
之材甚艱於選授以爾韻宇淹粹學問該明自佐于蕃
常聞竭慮宜丞中御之府仍贊司雍之臣更務首公以
答朝獎可

太子中舍監建州造茶兼買納茶務余良孺可
殿中丞餘如故制

勅某國家以封域之廣命中都官出幹外事三載有成
就加爵秩欲其昭勸之速也爾等早列閨籍閑練國章
徃佐牧民之官或領摘山之務閱閱來上歲月當遷中
臺望曹東序顯秩洎丞屬於御府皆仕進之榮塗差賞

爾勞以觀來効可

東頭供奉官閣門祇候王懷忠可內殿宗班依舊閣門祇候制

勅某早列官常游經事任歲時滋久勞効可嘉特疏寵於近班仍兼榮於上閣勉思勤瘁以答甄明可

翰林院藝學殿中丞同正蔡齊古可依前殿中丞同正充翰林院待詔制

勅漢金馬有待詔之臣備清問侍從之職唐禁林有執藝之士陳太古雅正之聲朝廷因之並建其選以爾具官某早工絕技克暢治音宜書歲月之勞式獎均調之業徃階顯秩無忝隆恩可

秘書省著作佐郎知蜀州晉源縣事張錫可太子右贊善大夫餘依舊制

勅某等明經中選敏學登科竭節効官在公凝績攸司大校賞典並行是用進秩上臺升華中御或飛榮於鶴禁或佐局於蘭臺各勵乃誠以答朝獎可

秘書省著作佐郎知蜀州永康縣兼兵馬監押
任文素可太子右贊善大夫餘如故制

勅某等國家考課績差善最所以辨百工之能求四方
之政者也以爾等早中朝選恪居官次勤宣幹力脩奉
彝章歲月貿移職用備舉攸司大校信賞並行引籍外
臺振纓中御洎春坊之畫諾皆仕路之美遷更務夙宵
無忝恩獎可

大理寺丞李象之等可太子中舍餘依舊制

勅某等經術該通吏能幹敏振纓理寺陟狀甚明結綬
賓筵薦章交上或陞華於鶴禁或佐職於棘卿各示甄
陞勉思自效可

大理寺丞充三門發運判官錢智周可太子中
舍餘依舊制

勅某等國家以功詔祿以能奠食申明善最之格旌辨
勤勞之臣所以勸天下以至公也爾等各員吏能屢分
朝命竭心從政潔已在公美課有聞賞典斯在宜進銅

靡之職或叅棘路之榮更務聿修以永終譽可

大理寺丞知絳州翼城縣姜矜等可太子中舍
餘依舊制

勅某早踐官榮克彰幹力及有考覈引對軒墀宜用陟
明以旌勤效或青闈振藻寔踐於朝闈或棘路陞華共
評於李法勉膺甄獎更勵夙宵可

太子中舍張行簡並可舊官制

勅某等早列官榮遽丁艱疚孝惟不匱誠合終身禮有
外除固難過制宜還官秩俾遂資忠可

工部郎中張士遜可戶部郎中直昭文館充壽
春郡王府官制

勅朕以愛子膺封建之禮慎選端士以輔導之俾其居
處出入之際聞忠孝方正之言故朕久思其人未易輕
授自非耆重孰副束求以爾具官張某資惟淑均理尚
清簡糾彈憲府漕輓外臺端懿之風碩茂斯允以爾具
官崔某業文甚雅守道不迴引籍諫垣勵精史局老成

之德慰薦良多是用簡自朕心命之王府第進在民之秩或兼上館之榮爾其祇荷寵章協宣懿效規諷禮誼

以臻于道予有望於汝也可

案真宗本紀大中祥符九年正月壬申以張士遜崔

遵度為壽春郡王友故制詞有具官張禁具官崔某之語乃制詞既明列二人而制題則舉張遺崔殊為踈畧又考遵度本傳真宗祀汾陰之歲命為左司諫七年降為右正言踰歲復秩九年命與張士遜並為王友改戶部員外郎則知遵度之為王友時以左司諫而加員外郎也但無別本可據姑仍其舊附記于此

起復雲麾將軍解州刺史本州團練使郭崇仁
可檢校工部尚書加食邑二百戶制

勅國家奉帝真之徽稱展郊廟之盛容禋福縣區推恩有位具官某威英御衆智勇出入學茂兵鈐識通民政而又常叅密命久奉戎昭功著邊陲家傳勲戚其或入奉朝請分刺藩宣任團結之崇資奉防秋之重寄克宣懿力綽有休聲方霈純禧宜隆異數或增榮於視秩或加賦于爰田洎登馭貴之階並示疇庸之典各思况瘁以答寵靈可

起復雲麾將軍解州刺史充本州團練使郭崇

仁可落起復授金紫光祿大夫餘依舊制

勅某彞鼎傳勲詩書稟訓早列通侯之貴遽銜陟此之哀爰及外除宜加茂寵俾進階於三品仍視秩於六官益隆團結之榮更勵夙宵之節可

給事中錢惟演可工部侍郎制

勅國家雕壤均恩積年滋久群吏大校鮮有陟明眷惟適臣宜用加寵具官某豐規映古雅望冠時盡瘁夙宵克宣於幹力周旋清要咸服於懿文况其世有大勲紀在王府顧久居於瑣闥宜擢貳於冬卿欽踐厥官以副朕意可

翰林學士給事中知制誥陳彭年可工部侍郎餘依舊制

勅朕以頌次先猷總裁大典誕播無彊之美寔資命世之才式慶成書宜加茂寵具官某清徽映世景行服人閑練典章周旋要近辨禮樂升降之數敦訓辭深厚之規明識遠猷藹於時望而自鋪觀注記紬繹信書約五

始之舊文宣兩朝之鴻烈時乃之力朕甚嘉之宜擢貳
於冬卿用增榮於禁省服茲休命更竭乃誠可

翰林學士工部侍郎知制誥晁迥可刑部侍郎
餘依舊制

勅國家頌次祖宗之典允資碩茂之才既紬繹以成書
實精研之備至宜推異渥式獎名儒具官某局致淵通
資氣淳素韞深厚之學藻潤於訓詞敦棲約之風靜一
於流競表儀群士茂聳明姿而自總緝舊章編研史策歷
年滋久宣力居多宜擢貳於秋卿俾增輝於內禁勉膺
寵眷無怠欽承可

給事中參知政事張知白可工部侍郎加食邑
五百戶食實封貳伯戶制

勅國家奉天尊道茂集於多儀論德第功誕均於純錫
眷惟良弼宜聳朝榮具宜某字韻中深志尚棲約總生
人之嘉秀蹈先哲之高衢內閣陞華竭誠而備問外臺
執憲正色以在公簡自朕心俾參柄用清機足以照理

奧學足以詢謀一德惟新九功咸序而自薦靈辰之實
號奉真祖之丕稱登徽謚於太宮報繁禧於陽值講求
故實贊相盛容陟降無違聲名允穆時乃之力朕甚賴
之特擢貳於六卿用加崇於四近仍增食賦併示徽章
噫隆器大名務從於褒異密謀潛慮寔佇於將明勉整
遠圖共熙至治可

樞密副使禮部侍郎晏殊可刑部侍郎餘如故
制

勅內樞之重密命是資允賴忠賢叅綜兵眷要惟勲舊
宜峻等威具官某道藝該明資性方格自懷名教之樂
淡於榮進之塗簡自先朝列於儲案輔朕初載克暢於
大猷登汝近司愈昭於懿德宜進天臺之秩用增機軸之
崇更佇訏謨啟迪予志可

起居舍人知制誥判昭文館盛度可工部郎中
餘依舊制

勅國家均慶頌祇之宮多歷年所大校群吏之治咸叙

其勞在於侍臣宜有殊寵以爾具官某周才敏用與學
雄文演潤之詞日彰深厚之美銓衡之任時推平允之
材久次近班彌昭令望宜正名於郎位俾增美於掖垣
更務誠明副茲甄獎可

刑部員外郎知制誥新知揚州王隨可工部郎
中餘依舊制

勅某朕魏睢覃慶多歷歲年中外庶官已從考陟左右
近職宜有褒優以爾早列綸闡出司留籥能以寬政惠
茲蒸人方別寄於藩條宜特隆於郎選佇聞治迹以稱
朕懷可

翰林學士主客郎中知制誥王曾可兵部郎中
餘依舊制

勅均慶隆睢歲時滋久陟明群吏甄獎居多眷惟清近
之臣宜茂褒優之典具官某韻宇宏遠資氣淑均潔已
無瑕早勵懷霜之志當官有守克彰匪石之心自振藻
於禁林寔飛英於雋域年華屢改時譽彌芳宜進秩於

中臺俾增輝於內省佩服優寵更務夙宵可

職方員外郎閻仲卿可也田郎中知耀州制

勅某資性矜嚴當官盡瘁洵更事任屢易歲時將涖近藩對於便坐俾正握蘭之秩用增分虎之榮善愛吾民以答殊寵可

刑部郎中充龍圖閣待制查道可右司郎中餘依舊制

勅朕自祇薦坤靈洵歷年所考陟載行於庶位既陞宜厚於邇辰具官某性本溫良識惟清遠回翔近署克遵慎密之規典掌攸司允著公勤之績蔚有詞藻頌其聲明久稽茂思未副朝論特進中臺之秩式增內閣之榮更勵誠明表予眷待可

三司鹽鐵副使刑部員外郎段暄可吏部員外郎餘如故制

勅國家覃慶汾睢于茲六稔庶官大校咸用陟明繁劇宣勞特宜䟽寵具官某等操履端肅器局淹通貳乃計

臣度茲邦賦籠山澤之利公家之用成充積歲月之勤
鉤考之文未至用特進於賞典俾俯勸於能臣祇荷寵
章更思况瘁可

王旦弟度支員外郎判國子監旭可尚書司封
員外郎餘依舊制

勅某上帝降衷賚予良弼交脩封祀之典宣臻揖讓之
治佑我鴻業格于皇穹哀哉云亡追悼何已眷乃同氣
素有令名避金穀之要司總膠庠之學館賞延之寵宜
異于常勉繼前脩式光華緒可

屯田員外郎同判定州張檝可都官員外郎餘
如故制

勅某朕以郡縣之治責在庶官三年有成急於加賞故
有就進爵秩以勸勤勞者也以爾業文中選厲節首公
闕決郡條熟習吏事有司會課善最居多建禮增榮命
數滋重勉思幹裕以答寵靈可

屯田員外郎監荆南鹽麴商稅務陳易從可都

官員外郎餘如故制

勅某等有虞氏之制三載考績黜陟幽明朕舉而行之
以勸臣下以爾等服勤官次各有吏能枝課最於攸司
上閑閱於宰府宜進文昌之秩或升中御之丞各荷寵
靈更圖來効可

新差荆湖北路提點刑獄太常博士江嗣宗可

屯田員外郎餘依舊制

勅勞臣不進材臣不勸故朕宣明考績甄序流品以爾
具官某等服勤官次引籍朝闈綽有政能多歷年所爰
觀陟狀用錫寵章司輿建曹墾田列職臺郎之選於是
為優勉竭乃誠無忝休命可

太常博士知廣德軍陳覃可屯田員外郎餘依

舊制

勅某等古者以尚書郎主屯田積穀之事以充經用國
家頗重其選未易授人今爾等辭藝該明吏事周敏任
勞可紀會課居多以升厥官更佇來効可

太常博士知眉州劉忠正可屯田員外郎餘依
舊制

勅某等漢魏以尚書郎主墾田虞衡之事分曹建禮職
亦甚重以爾等清潔秉志勤勞首公或守郡坤維詳刑
嶺表皆以吏課列於有司考覈以聞陟明斯在第陞華
序用勸朝倫欽踐厥官更思况瘁可

太常博士充祕閣校理韓羲可祠部員外郎餘
如故太常博士胡淳可屯田員外郎制

勅文昌政化之本臺郎要近之官儻非時材曷稱朝選
以爾韓某藝文深厚躬博雅之姿胡某吏理精詳懷清
白之操並處曲臺之秩或參祕館之榮第課當遷賞勞
斯在宜分曹於建禮俾應宿於太微勉勵清修無忝朕
命可

國子博士侯自成可虞部員外郎制

勅某奧學名家周才幹裕洊更事任克著勤勞宜自成
均俾參郎選分曹建禮實總虞衡足謂美遷勉思盡瘁

可

太常博士朱頔可屯田員外郎制

勅某懿文中選慶胄承芳竭志臨民薦章交上勤心釐務美課居多考績攸司引對便坐簡自朕意俾圖爾勞或超踐於天臺或第陞於棘路各欽異渥共勵乃誠可太常博士盧宗可屯田員外郎制

勅太微積星蔚為郎位選授之際所宜得人以爾某早業懿文世蹈方穀曲臺引籍列郡班春奏最居多考課

斯允是用擢之省局實掌公田欽踐厥官無忝休命可

比部員外郎通判泉州徐仲翔可駕部員外郎制

勅汝承榮閨籍通守泉山奏課攸司備觀於幹力疇勞省局宜進於望曹善撫遠民以稱朕意可

監察御史知陝州軍府事李階可殿中侍御史餘依舊制

勅某分陝奧區介於司雍控引川陸蕃輔京師共治之

臣甚難其選苟得良牧何吝寵章以爾文藝優深識度宏遠頻繁事任淹歷歲時潔已臨人在公正色滑鄭之治民甚便之宜進榮資俾臨劇郡必有嘉効以稱朕知可

前侍御史呂言並可舊官制

勅某等早通閨籍遽執親喪欲報之哀固云罔極免懷之制蓋亦難踰宜及外除還其舊秩更思移孝以永揚名可

秘書省著作佐郎鄭隨可秘書丞制

勅某中秘屬丞右文清選以爾早登榮級屢奉官箴有司疇勞便殿引對授以斯職寔踐朝闈尤為異恩勉圖來効可

光祿寺丞朱正辭可秘書省著作佐郎制

勅某著作之局頌次信書妙簡清材以佐郎選惟爾先正頃在禁林奉身自高朕甚嘉賞果有令嗣克紹清聲飾吏以文首公為操當其考績是用陟明往踐厥官勉

圖來効可

前泰州軍事判官試大理評事趙定可秘書省
著作佐郎制

勅某茂蘊時材勤宣幹力歷年滋久奏最居多引籍芸
肩陞華月寺第勞而授無怠欽承可

前興州軍事推官桑衍可秘書省著作佐郎制
勅某著作之廷昔為史局佐其郎選必簡賢勞令其早
擢科名當參幕畫勤勞匪懈稱薦居多宜有甄陞以勸

清慎可

前保慶軍節度推官趙應言可秘書省著作佐
郎制

勅某朕博選群材並建衆職有善可賞未嘗遺之以爾
榮名詞科從事戎幕當官有守潔已無瑕擢自群倫必
有招勸中秘之屬選授甚清更勵乃誠以答休寵可

故司空致仕贈尚書令追封韓國公李昉孫男
昭邈等可試秘書省校書郎制

勅某在昔乃祖克享隆名良規未改于正司茂烈尚藏
于盟府屬均鴻慶宜茲後昆勉膺試吏之榮無息亢宗
之志可

秘書省校書郎制

原本闕除授人姓名

勅某榮名桂籍試吏芸扃求歸養於蘭陔已屢遷於圭
籥覽守臣之列奏知爾父之有瘳俾再踐於初筵仍就
趨於近郡用旌孝則以佇忠規可

內殿承制閣門祇候吳元慶可供備庫副使制

勅某軒墀之列諸使為優推選賢能以貳其職以爾生
於鼎族早佩官箴歲月屢遷勤勞匪懈宜有加賞俾預
近班祇荷寵靈勉思况瘁可

南作坊副使錢守吉可供備庫使制

勅內外諸司分置使領軒陛之右秩甚優殊以爾某局
致淵通儀範端肅服勤官次屢易歲時况其世有茂勳
書在盟府宜推恩典俾正職名勉罄乃誠更圖來效可
中允知榮州公孫儀可太常丞餘依舊制

勅某等竭慮首公勤心幹裕有司較其課最宰府詳其
開閱名在賞格朝命是行或引籍曲臺或發辰中御各
欽茂渥更勵乃誠可

殿中丞新差通判石州和郁可太常博士餘依
舊制

勅某等引籍朝闈服勤官次考其課最時用陟明或命
秩於曲臺或陞華于中御各膺茂典更勵乃誠可

殿中丞知開封府司事叅軍楊佶可太常博士

餘依舊制

勅某朕並建衆職分又中區念勤簡勞惟恐不及以爾
懿文中選亮節首公識度清和操履方雅考其底績合
預陟明曲臺禮官舉以授爾噫天府浩核牒訴控惚糾
繩之重爾方居之勉宣令猷以答殊獎可

前太常博士任中行可太常博士散官制

勅某懿文中選幹力首公擢倅浩穰徧游晉縈方展技
虛之刃遽貽藉藁之愆屬茲均禧特從牽復勉圖况瘁

以答朝榮可

殿中丞通判河南府王正倫可太常博士制

勅具官等虞舜陟明之典成周鈞考之法朕總而行之
以辨群治爾等懿文中選茂學承家咸奉官箴並成吏
課宜有甄賞式勸勤勞訓禮曲臺詳刑棘路各欽異渥
共勵乃誠可

太常寺奉禮郎任同可舊官服闋制

勅具官執喪之禮式及外除掌禮之司所宜復序恪居
乃職無怠資忠可

欽定四庫全書

文莊集卷二

宋夏竦撰

制

衛尉寺丞趙鼎可依前尉寺丞兼宗正寺主簿
制

勅某國家率陶唐先親之典右宗周宮正之任妙選同
姓以脩屬僚以爾早著吏能克勤官守俾兼勾稽之闕
更觀夙夜之勤可

故守太尉尚書令王旦男大理評事雍可光祿

寺丞制

案王旦傳旦薨後錄其子弟姪外孫門客常從授官者十數人此制云矧保家

之令嗣洎猶子之惟親即傳所云錄子姪事題中舉子遺姪當有脫漏

勅某等朕得良相登翊大猷擢士以公處身以約四近之位萬方是毗國之彞章歲有勲蔭每自謙抑罕欲奏言及此云亡深用傷悼矧保家之令嗣洎猶子之惟親咸有懿文並承清德宜推延世之賞式彰有後之榮各務進修承茲闕閱可

將作監丞知大寧監張師顏可大理寺丞餘依

舊制

勅某襲慶德門隸官繕監用施事任縣歷歲時考績有聞賞勞斯在叅丞棘路更屬乃誠可

前衢州軍事推官范謂可大理寺丞制

勅范謂爾久列初筵克陳婉畫薦章交上考績攸同棘路屬丞疇榮而授更思况瘁以荅殊榮可

前京兆府觀察推官冉宗元可大理寺丞制

勅某朕每臨便坐親對羣吏至於斯是以觀其能汝早
列賓筵克明政事宜從簡擢以懋勤勞往丞理官勉副
殊獎可

大理評事祕書校理通判渭州王夷簡可大理
寺丞餘依舊制

勅某隴阪故區西陲要郡汝閔掌其政幹力有聞考秩
將終邊臣奉請俾加榮於棘路仍典校於祕文式遂借
留更觀來效可

前權知單州團練推官廳公事沈澤秀州錄事
參軍鄭知白並可大理寺丞制

勅國家克謹銓筦澄鑒品流妙擇時材分緜群務以爾
具官鄭某監目慰薦綽有政能具官沈某閱閱具存訖
無痕累簡自朕意俾圖爾勞往丞理官無替厥命可

太常寺奉禮郎監濱州監酒稅務陳榮德可大
理評事餘依舊制

勅某寺素擅藝文早藉勲蔭並登仕路各著吏能勤勞

有成考較惟允第加寵擢用示陟明勉稱厥官以永休
譽可

太常寺奉禮郎裴德輿可大理評事制

勅某早承華緒式奉多儀爰考踐揚頗彰勞効宜特陞
於棘路俾共讞於丹書勉荷寵章無忘祇慎可

太常寺大祝董仲容可大理評事制

勅某承榮華緒效職曲臺勤勞在公考諫斯允宜脩理
官之屬共詳丹筆之文更務矜脩以永休寵可

殿中丞熊自成可國子博士制

勅某等朕懋建度官分又九域簡其勤勞急于勸賞攷
攷肝食甚于臣下之求爵秩也以爾等厲言治經各中
科絀當官釐務並有能稱建禮遷曹上庠引籍陟明之
典于是為優勉罄乃誠以副清逸可

知饒州樂平縣楊簡除國子博士荆

勅朕方崇長學校所以加惠諸生甚渥也則聯教事其
間宜得名士爾簡蚤有賢譽不求聞達徒勞縣章益務

持養是以不俟滿歲俾長胄子豈惟諸生又以為善類
勛也可

諸王宮教授兼國子監設書制

勅某朕躬訓宗枝幼皆嚮學思得儒有授之以經以爾
脩職均庠勵精弦誦特陞榮於祝史俾善誘於黌綱宜
竭乃誠以荅休命可

新除祕書少監致任胡旦男叔彩可試將作監

主簿制

勅某乃父材名甚茂疾疹久嬰爰列奏封懇辭榮寵方
遂奉身之請特豐延世之恩試吏起家爾當自勉可

太府卿權西京留守御史臺裴莊孫男令孫可

將仕郎試將作監主簿制

勅某爾父官重月卿任分烏府適屬均恩之際亟陳詒
厥之誠宜升試吏之榮俾遂起家之志慎初之訓爾其
念

河東轉運副使太常博士王平弟弁可將作監

主簿制

勅某爾兄往臨大鹵寔掌飛芻爰拜露章具陳友愛宜錫起家之命俾參試吏之榮當慎厥初以永休寵可

故兵部郎中知應天府兼南京留守司王勗男太廟齊郎晦可將作監主簿制

勅具官某汝父挺生德門艾服王政近付留籥徃釐南都遽茲淪亡深用嗟悼特宜延賞式一勉勵厥修以隆華緒可

故光祿卿沈繼宗次男試將作監主簿惟恭可守將作監生簿制

勅某世濟德芬間藉勲蔭久參試吏方屬均恩俾正職名更思兢慎可

堂後官主客員外郎提點五房分事劉明恕可朝請大夫加輕車都尉制

勅國家奉天尊祖裸鬯升烟離畢盛容誕均繁祀春茲殞望宜霈渥恩其官某器度清和忘尚冲粹博通孺訓

詳練明經而自率職相庭兼榮即位總轄尤重奉號令以無違勤舊有聞歷歲時而滋久矧在下郊之始務嚴置蒞之儀書詔尤多禮文為盛爾並提綱領無爽規程時乃之功深用嘉賞貴勲榮級併示褒優勉罄乃誠永荷休寵可

堂後官大理寺丞張仁惠等可加輕車都尉制勅某等國家薦寶號於帝真集上儀於郊廟誕推異渥式獎能臣以爾等清慎修身端和毓性該通庶務閑練舊章自恭事於槐庭常服勤於芝檢詳明率職盡瘁首公屬茲均慶之辰並進書勲之籍荷茲獎飾更厲乃誠

刑部員外郎兼侍御史知雜事吳夷簡可朝奉郎加上輕車都尉制

勅國家薦靈震之寶號奉真祖之鴻名登徽謚於太宮報繁禧於陽位休嘉總至慶賜方行况在能臣特隆異數具官某儀範清肅性尚淑均昭映世之豐規萃高門

之積仿周施徽序祇慎官箴慰薦之章交於公府敏學之譽溢於朝闈俾雜治於憲臺寔勤置於令望侍祠之際率職茲恭宜進階資仍遷勲級勉修懿德以稱朝榮可

樞密直學士河北都轉運使工部侍郎李士衡
可中大夫上輕車都尉制

勅國家薦號密都欽柴泰時神觀治茂大慶方行乃春近臣特隆異數具官李士衡秉節高亮資氣淑均德藏芝蘭志懷霜雪竭心披藝奧蹟以研幾正色首公雍容而幹事而自樞庭入直起部升華朔野而南滎河以北委之漕事克有風聲經用羨饒庶吏清肅方均靈浸併錫徽章勉罄乃誠以荅朝獎可

右千牛衛大將軍致仕蔣文肅可加食邑制

勅某國家奉天尊祖祿登升裡誕需鴻禧周子有位以爾等資性沉毅茂略淵深祇慎官箴頻繁事任而能覽止足之分敦避讓之風致政公朝升榮近衛屬此均禧

之始宜推加賦之恩荷此寵靈勉自頤養可

大理評事楊侏可衛尉丞制

勅某早階仕路各奉官常考績攸司勤勞可紀升榮鄉
寺祿秩為優更務首公以答明賞可

大理評事唐均可衛尉寺丞餘如故制

勅具官某寺夙承勲緒久踐仕塗吏課有成朝賞斯舉
震維引籍寔擬於上臺環衛陞榮最龍於中禁勉服休
寵無怠厥官可

利州路轉運使工部郎中呂言可刑部郎中餘

加故殿中丞同判鄧州朱正基殿中丞知華州

華陰縣事楊政化並可國子博士餘如故太子

中舍知越州餘姚縣事韋覺可殿中丞餘如故

制

勅國家引一代之材布四方之政省錄勤吏日簡朕懷
以爾某寺性蹈謙雍治中寬猛徃監司於郡國或撫養
於黎蒸咸能首公克成成績建禮司刑之重東庠講學

之榮洎中御之屬丞皆上臺之清舉第勞而授惟政是
繁無替厥官以忝予命可

都官郎中知刑州巖頴可職方郎中餘如故荆
湖南路轉運使職方員外郎康孝基可祠部郎
中餘如故太常丞同判福州王瀆可太常博士
餘如故太子中舍知鄆州平陰縣事陳保和可
殿中丞餘如故制

勅國家尊右文治重愛生民以臺省之要官登郡國之
衆務疾非甄善唯恐後焉以爾具官某苦心職甚明材
用尤脩考其官闕各有事功宜舉成科並增顯秩爾其
除煩就約徇公成私免維前修無替朕命可

祠部郎中知宣州江嗣宗可度支郎中餘如故
屯田郎中知臨江軍熊同文可都官郎中餘如
故太常博士知岳州張稹可屯田員外郎餘如
故國子博士知榮州趙瑜可虞部員外郎餘如
故殿中丞知富順監朱良治可國子博士餘如

故太子中舍同判眉州文可觀可殿中丞餘如
故制

勅郡國朝廷之屏幹牧守生民之父母教化所自選授
惟艱勞之不圖吏將安勸以爾具官某等踐履方於文
劄詳明或處千里之師或貳諸侯之治爰考官閱率如
風謠宜即所居第進榮秩夫清約可以行已寬厚可以
安人勉速前良無替朕命可

金部郎中知洛州李文著可司勳郎中餘如故
太常博士同判蘓州李意可屯田員外郎餘如
故殿中丞同判汾州馬張可太常博士餘如故
殿中丞同判鼎州甄化基可國子博士餘如故
太子洗馬知汝州襄城縣事乘允恭可殿中丞
餘如故制

勅朕懋建郡吏分幹中區賞以及勞爵以序德以爾等
矩度修絜文理精詳考閱之績勤訖更痕殿量功次
而差授並用甄陞勉圖後勳以永終譽可

廣南東路轉運使司封員外郎李適可工部郎
中職方員外郎知鄂州高慎交可屯田郎中祕
書丞知岳州臨湘縣事張惟諤可太常博士祕
書丞知洪州豐城縣事孟虛舟可太常博士太
子中舍知信州上饒縣事賈守文可殿中丞太
子中舍同判信州張同文可殿中丞殿中丞知
白州劉宗諒可國子博士大理寺丞知宣州宣
城縣事查慶之可太子中舍衛尉寺丞知湖州
烏程縣事方仲弓可大理寺丞制

勅國家敦厚治本重惜生民以臺省要官長州縣衆職
復東良儁式脩監司勤之可圖寵爾殊等具官某等志
尚清約事任頗繁徃幹漕輓之權或分守宰之寄風謠
載舉善最有聞並書厥勞第增乃秩勉遵寬大之詔稱
茲褒異之恩思齊古人以永休譽可

殿中丞田慶餘譚雍並可國子博士太子中舍
畢從善可殿中丞太常博士同判揚州吳待問

可屯田員外郎餘如故太子中舍知汾州平遙
縣事李永世可殿中丞餘如故衛尉等丞知淄
州淄川縣事李庭堅衛尉寺丞監温州前倉鎮
茶鹽酒稅務向約並可大理寺丞餘如故制
勅以祿詔爵以德懋官順考舊章無尚於此以爾具官
某等政體勤曉風行潔清宜錄乃勲遞增爾秩式旌課
最昭勸官師服此朝榮更當自竭可

屯田員外郎同判池州蕭玠可都官員外郎餘
如故虞部員外郎知蔡州張用可比部員外郎
餘如故虞部員外郎知慈州劉餘慶可比部員
外郎餘如故殿中丞同判鎮戎軍田士身可國
子博士制

勅國家順天制官敷求民瘼量能授爵崇屬時材具官
某等吏事修明風迹沉厚允懷清約之節不持刻敝之
文及此第勞所宜差賞勉圖堪副無忝朕恩可

國子博士知資州高繪可虞部員外郎餘如故

太子中舍知福州吉田縣事沈亢可殿中丞餘
如故制

敕具官某等庸蜀奧區甌閩劇縣徃釐民政各奉官箴
宜升建禮之曹式丞中御之府用旌美課以勸庶工可

祕書丞同判延州劉訥可太常博士餘如故太

子中舍知揚州天長縣事徐善寶可殿中丞餘

如故殿中丞楚繼方可國子博士權御史臺推

直官殿中丞戴融可太常博士餘如故著作佐

郎充北宅諸院教授王式可祕書丞餘如故制

勅具官某等或詳晚政經或兼該學術服勤官次第課

可嘉進秩朝間寵章斯允更圖來効以荅茂恩可

殿中丞同判單州竇處約可國子博士餘如故

太子中舍同判夔州李惟寅可殿中丞餘如故

制

敕具官某早引閨籍徃貳郤條議法尚寬持心近厚特
書課第並進官榮善撫蒸人以稱朕意可

殿中丞新差同判鄂州令狐頌可國子博士餘
如故太子中舍新差通判澧州魏瓘可殿中丞
餘如故制

敕武昌江漢之衝澧陽邊要之重今得閏彥往貳郡廷
宜簡前勞以勸來效具官令狐頌博文好古踐履方廉
具官魏瓘飾吏首公志尚清約並有名迹洽于風謠東
庠儒雅之選中御丞佐之選各欽厥職式副朝榮可

殿中丞知河南府王屋縣事呂荀可國子博士
餘如故太子中舍知青州千乘縣事郭長吉可
殿中丞餘如故制

敕具官某等或引籍朝闈或飛榮儲室出為宰字善撫
黎蒸會課當遷推恩頗厚勉懷清約無忝甄陞可

李遵可洮州刺史充保順軍節度使制

勅臨洮奧區河湟近服久被朝化屏茲西陲乃眷忠臣
俾分邦寄以爾某直方毓性英勇冠人傾金石之心仰
尊於王略勵雪霜之節屢效於忠規是用簡自朕懷擢

居戎閫槐庭視秩賜八柱之貴勲茅土䟽封峻三品之榮寵兼官憲府頒賦爰田便繁渥恩度越倫等整竭誠信保寧塞垣勉守令名副茲旌賞可

侍衛親軍馬軍都虞候桂州管內觀察使桂州刺史郝榮可刑州刺史充安國軍節度觀察晉後加食邑五百戶食實封二百戶制

勅節制兵戎廉察藩翰並司留務允謂隆恩以爾具官某早著事功久司兵要威名克著功次當遷宜靡限於彞章俾特陞於顯秩更宣忠力以副朝榮可

三司戶部副使禮部郎中李及可吏部郎中充淮南轉運使制

勅貨食之府條政寔繁久貳厥官宜有加寵以爾某等雅尚冲邃茂學兼該各以時材稱茲劇職勤勞斯久甄序宜優俾超踐於臺郎仍分總於漕事勉思竭慮以答異恩可

轉運使並加階勳制

勅國家薦有帝之號奉尊祖之名繫裸玉於太官展飲
柴於陽位誕均純賜以寵能官以爾具官某等性尚平
夷器能秀峙或振纓學館茂發於懿文或引籍朝闈勤
宣於幹力而自總司漕職恪守官箴慎罰以寬能體好
生之德籠材有道曾無刻下之煩慶賜方行階勳第進
無忘刺舉以荅寵甄可

右諫議大夫分司西京宋惟幹等可中大夫進
封開國伯加食邑制

勅國家薦號帝真展家郊廟眷惟有位咸霑鴻恩具官
某等亮節清規懿文茂學或早游清貫秩亞於地官或
屢展幹才任隆於諫省或正握蘭之秩或居象月之崇
或分務於西都或奉身於私第皆著老成之德允昭靜
一之風屬此均禧所宜䟽寵增勞動品益賦圭田暨加
馭貴之階並示優賢之典欽茲朝命更勵乃誠可

故知古州向光璿男守玠可銀青光祿大夫國
子祭酒兼監察御史武騎尉知右州軍州事制

敕某汝世荷朝榮夙懷忠節時允邊臣之請俾分列郡之權寵教有加國章斯重益輸丹款以荅隆恩可

殿中丞李周士可太常博士通判秦州軍州事
餘依舊制

勅某官某朕申命攸司鈞考群治賞之小大必及於榮以爾清白承家儒雅飾吏歷年滋久奏最居多奉常禮官漢唐重選以旌汝效足表異恩可

祕書丞張慎言可太常博士知房州制

勅某房陵舊區其地巖險授之以政尤在得人以爾學古効官懿文節政屢更年籥克守官箴善最居多考校惟允宜隆朝序俾奉藩條噫急吏緩民所至皆治正心潔已不令而從蚩蚩之氓皆朕赤子善加愛育無忝朝榮可

青州司馬于祐之可青州長史制

勅某等早預官榮式貽公憲屬茲寬宥咸與惟新勉膺遷予之恩更勵省循之志可

鈞容直製撰應奉文字孫渥可將仕郎守衛州
叅軍依舊祇應制

勅某環衛之師寔有武樂汝早為其屬造彼優辭頗積
歲時未預官牒爰加散掾以賞厥勞更務竭心庸資獻
曲可

懷州武陟縣尉張知至可光祿寺丞監西京洛
河抽竹木務制

勅某朕得良弼叅東大鈞密議贊於帝謨清德溢於民
聽殊倫之寵予何吝焉宜從一尉之資擢預九卿之屬
仍移近任用表異恩可

隴州團練使知雄州高繼勳可連州防禦使捧
日天武四廂都指揮使知瀛州軍州事及管內
勸農使充高陽閔駐泊兵馬鈐轄制

勅三軍之重四貉是威妙柬忠勤總司管府以爾具官
某頻繁事任詳練邊機武節方嚴兵謀沉密宜正防秋
之任俾司扈蹕之師更務訓齊稱茲選授可

澧州造士王宥字可守本州助教制

勅某刻心文史勵節邱樊積有歲時達于聞聽宜遂起家之望用敦養素之風祇事郡廷無忝朝命可

唐晉國公裴度五代孫坦可鄭州助教制

勅某在昔乃祖寔相有唐殲厥兇渠盡力王室歲月滋久功名愈高朕歷選忠良想見風采爰訪樞近得其後昆特霽朝恩以勸來者可

河陽中州習學究朱允修可將仕郎守孟州助

教制

勅某等或學校諸生或鄉閭著姓能散私廩賑彼飢民以財發身亦可嘉也具有賞典今舉而行各行寵榮無忘兢畏可

天雄軍單習三傳王範可大名有文學制

勅某汝占籍侯藩潛心經業能以私廩佐于公衆賑爾鄉民濟其艱食宜升郡塾以獎能誠更務於修以永休寵可

故保平軍節度使同中書門下平章事駙馬都尉魏咸信可贈中書令制

勅國家褒崇密戚傷悼茂功中鉉聯榮久叅於眷倚西
臺正位早極於追旌具官某文武兼資箕裘濟美受勲
蔭於懷衽稟命畧於庭闈博通禮樂之原周知教化之
本而自降嬪魯館推轂漢壇出總藩條入陪鼎席勤王
之業紀在太常體國之忠書於甲令方全饗用之福遽
與愍遺之哀特加石相之崇用極惟親之贈英魂不昧
尚服寵靈可

故守司空兼門下侍郎平章事王欽若可贈太

師中書令制

勅國有元老遂階成勲天乎難謀曾不愍遺特稽殊等
之禮用章虧體之哀故具官某峻極降神生民總秀逮
事先帝久服大僚勒封岱宗偃仆師節輔致鴻業格于
皇穹肆予冲人靈承景命寔賴盡規之力紹隆累盛之
基及茲云亡深用哀悼尚父維師之重周官內史之崇

並刻密章以付幽窆死且不朽永賁忠魂可

故贈侍中楚昭輔贈中書令制

勅朕昨者薦玉真區觀風近甸眷興王之舊壤懷佐命之勲臣存則懋延賞之恩沒則峻追榮之典具官某端介自守沈鷺有謀早事先朝罄輸亮節嘗總司人樞務寔備竭於忠規屬茲均慶之辰宜霈漏泉之澤而臺重地右相崇資允極哀榮永昭幽窆可

甘州外甥回紇可漢王伊魯格勒可特進懷寧順化可汗王制

勅王者孝治萬方蓋重展親之興恩加群后務昭崇德之規矧在吾甥久綏遠略特舉褒優之命用伸眷倚之懷具官某茂烈傳家英威服衆智慮深邃詳練於武經志行直方克敦於臣節而自撫臨西夏屏翰中原允彰保塞之勲特茂勤王之業仍遠修於職貢是愈見於忠誠寔簡朕心時隆朝獎進褒功之懿號兼馭貴之殊榮夏越等威用旌忠毅噫山河誓寵朕務在於推恩金石

盟心爾無忘於報國終始一志以保令名可

祭酒兼監察御史武騎尉充本族軍主制

敕某性稟忠純志懷剛果來歸德化達朕聽聞宜霽殊
息以俟忠效可

欽定四庫全書

文莊集卷三

宗夏竦撰

制

李氏可才人制

勅某謙祇率禮端懿傳芳自恪奉于宸闈寔存更於歲
籥久播柔嘉之譽宜推甄獎之恩俾陞嬪侍之榮用勸
肅恭之德欽茲寵渥更勵夙宵可

保大軍節度使同中書門下平章事錢惟演妻

清河郡夫人張氏可追封郇國夫人制

勅良佐奮庸極文武之隆器小君啟國顯山河之盛儀
非疇大功孰預茲典具官某妻方江起詠照史知言珩
璜節于步容蘋藻恭于祭制生彼勲緒儷予柄臣斗極
樞機嘗對宣于密命文昌將相寔並應於列躔是增石
窳之封益表鵲巢之德永宜象服以稱徽章可

故信都郡王德彞妻東平郡夫人劉氏可追封
蕭國夫人制

勅國家追寵茂親已疏于顯爵襄崇內饋特舉于徽章
式推涌壤之恩用正從夫之典具官某妻某氏秘儀景
胄作合懿藩奉蘋藻之多儀體山河之盛德披圖問理
觀史求箴鷄鳴宣輔佐之勤鵲巢懷均壹之美降年不
永遺範傳芳宜開大國之封俾極小君之貴告于茲宥
尚此寵靈可

樞密副侍工部侍郎任中正母萬年縣太君劉
氏可進封太原郡太夫人制

勅朕詢求碩德叅總樞衡庶政寔繁方深於倚賴母儀
尤重宜示於褒崇以爾具官母氏端肅成規雍和䟽性
擇隣以處著慈訓而有方鳴玉而朝率禮經而無怠誕
生間傑副朕疇咨宜開列郡之封用正小君之位有家
之慶無尚於茲可

贈鎮南軍節度使王中正妻吳興郡君施氏可
特進封渤海郡夫人制

勅追旌懿德已隆分閭之恩眷乃中闈宜正從夫之典
具官王某妻某氏柔儀祇肅士族輝華動遵鳴珮之音
不失采蘋之職訓內則之禮表式於外姻鑒鷄鳴之詩
儆戒於君子成其高尚之節享茲存沒之榮方銜恤於
帷堂特䟽封於列郡欽膺徽序無怠乃誠可

侍衛親軍馬軍副指揮使保順軍節度使彭虜
妻滎陽郡君

勅齋壇進律方增虎旅之權石窳䟽榮宜表鵲巢之德
具官某妻珩璜節步詩史照言作儷寶臣總司馭騎文

昌著象甲令書忠寔開大郡之封用示小君之號勉修
閭則以稱徽章可

樞密副使禮部侍郎晏殊妻江夏郡君孟氏可
進封銀鹿郡夫人制

勅洪惟有帝夢賚忠賢式登用於近司宜寵褒於內饋
具官某妻保阿承訓圖史照言法容潤於山河體柔潔
於蘋藻儷良弼翊我大猷近入奉於中叅已載頌於
象服宜舉從夫之典更開列郡之榮勉荷寵章稱茲徽
序可

左諫議大夫叅知政事王曾妻江夏郡君李氏
可進封隴西郡夫人制

勅朕詢求人望叅掌國均垂拱無為方倚成於萬務疏
封示寵宜特異於中閨具官某妻某氏婉嫕流芳柔嘉
毓性奉蘋繁之職務極於齊莊照圖史之規動遵於法
度儷我良弼茂此嬪風屬茲任德之辰宜舉從夫之典
小君進號近郡疏榮更肅柔儀副茲異渥可

給事叅知政事張知白妻太原郡君王氏可進
封瑯邪郡夫人制

勅朕大庇懷生勤求至治爰得良弼方贊於近司乃眷
中閨宜隆於徽序以爾具官某妻某氏謙祇率禮懿淑
傳芳稟嘉慶於華宗茂嬪風於鼎族克謹采蘋之職不
忘照史之規配我名臣貳此柄用夙夜儆戒諒增內助
之勞湯沐疏封宜進小君之號更思輔佐以答恩榮可
刑部侍郎叅知政事陳彭年妻南陽郡君樊氏

可進封南陽郡夫人制

勅朕穆卜忠賢協宣政治鴻鈞播物方佇於嘉猷石窌
疏榮宜隆於內饋以爾某官某妻某氏承徽令族觀戒
女圖動止有嚴不變珩璜之節肅雍成裕克恭蘋藻之
儀儷我良臣成茲懿範宜正小君之位寔開列郡之封
更率謙祇副茲寵飾可

侍衛親軍步軍副指揮使建武軍節度使夏守
贇妻進封郡夫人制

勅維彼元戎式建靈臺之節眷茲內饋宜增石窳之封
具官某妻鍾鼎傳家山河著德采蘩率職珮玉節音作
儷將臣載司禁旅是舉從夫之典特疏列郡之榮欽奉
寵靈以稱徽序可

河北都轉運使樞密直學士工部侍郎李士衡
妻安吉縣君雷氏可進封馮翊郡君制

勅國家事天尊祖並薦鴻名裸鬯欽柴繼成大慶方推
恩於密侍宜流寵於閨門具官某妻某氏率禮公宮奉
嬪冠族采蘩承祭務極於齊莊觀史照言動遵於法度
輔佐君子為我良臣入直樞庭出司漕事忠規載罄特
譽彌優屬方霈於純禧宜特褒於內饋左馮奧壤進啟
郡封更蹈謙祗以膺徽寵可

侍衛親軍步軍副都指揮使建雄軍節度觀察
留後管勾步軍都指揮使公事彭睿妻北海郡
君鄭氏可進封滎陽郡君制

勅禮成陽位澤浹緜區眷惟將帥之臣宜茂閨闈之寵

以爾具官某妻某氏照言圖史率禮保阿承祭公宮時
中於四德作嬪茂族為憲於六姻宜增列郡之封益表
從夫之貴可

侍衛親軍馬軍副都指揮使彰德軍節度觀察
留後管勾馬軍都指揮使公事楊崇勳亡母京
兆郡太君王氏可特追封廣陵郡太君制

勅穆卜陽郊式展欽柴之報眷惟良帥方深濡露之思
是用追榮俾昭遺範以爾具官某母照言圖史率禮保
阿蹈蘋繁柔潔之規懷山河容潤之德生茲令嗣為朕
寶臣勇畧冠於六師威聲震於四貉宜旌慈訓進啓邑
封永賁前寔尚茲休寵可

侍衛親軍步軍副都指揮使建雄軍節度觀察
留後管勾步軍都指揮使公事彭睿亡母河間
郡太君劉氏可特追封宣城郡太君制

勅薪蘊盛節聿成饗帝之儀介胄純臣宜重顯親之典
具官某母承榮鼎族率治公宮特生材賢為朕心膂敦

詩書而講藝比金石以輸忠宜進郡封式昭慈範隆恩
不朽永賁重泉可

左騏驎使入內都知澄州刺史張景宗母追封
琅邪縣太君王氏可追封馮翊縣太君制

勅國家事天尊祖裸鬯欽柴鉅典交修繁禧均彼眷惟
追職時乃信臣寔懷顧復之慈宜峻追旌之典具官某
母某氏祕儀素里垂範通門觀史照言既族姻之為憲
斷機喻學果似續之其昌生此令人際予享會當腹心
之重委茂忠孝之純誠享斯列鼎之榮每極履霜之感
鴻恩方霈遺範是褒進開大邑之封用極涌泉之罷貞
寬不昧尚服徽章可

誥

前泰寧軍節度副使成昂可太府少卿致仕誥
勅某方州庶務重煩耆年朝命特行則有貳車之授引
年請老則有致政之榮爾適彼寵恩遂陳奏列從人之
欲朕何吝焉俾貳春卿甚優常等荷茲渥綈勉自養願

可

尚書祠部郎中胡旦可銀青光祿大夫行秘書
少監致仕誥

勅國家大庇中區寔右文治思皇多士粉澤時政况夫
披執該洽屬言典要之臣故當寵異而優假之以爾具
官某學必傳經文皆約史早冠群彥聲華藉甚爰在西
掖詔令敏贍久次于外朕常念之而疾疹所嬰封奏來
上辭語懇激覽之依然特遷三品之階仍副中秘之任
服此榮寵勉自養頤可

東染院副使李繼源可左領軍衛將軍致仕誥
勅李繼源自列軒墀屢更事任載觀封奏懇叙高年特
遷環衛之資俾遂奉身之請服此榮寵勉自養頤可

演州團練使右領軍衛大將軍李延渥可左衛
大將軍致仕誥

勅某宣力軍和分榮使竹洎嬰霜露之疾優以環衛之
資而醫砭未平歲華遽改爰達誠於封奏願致政於公

家且進秩於鷹揚俾奉身於私第荷茲休寵更務養頤
可

詔

賜玉清昭應宮使王曾等詔

勅王曾等省所奏遇朕乾元節集闔宮道衆於明慶殿
開啓朝真禮念道場一月祝壽錄功德疏二道上進事
具悉卿等總司靖館祇率真科以予誕育之辰罄乃齋
明之懇啟清場於琳殿宣秘蘊於琅函集福眇躬列誠
封奏載惟忠恪人尤切歎嘉故茲詔示想宜知悉

賜四宮觀使王曾等詔

勅王曾等省所奏伏遇天祺節集闔宮道衆就紫微殿
轉念真經聖號祝壽寫錄到功德疏二道上進事具悉
卿等恭司靖館肅奉真儀屬首夏之初辰實受符之紀
節祇率焚脩之衆廣宣微妙之文罄乃精誠祝予涼德
載惟愛戴彌切歎嘉故茲詔示想宜知悉

賜四宮觀使王曾等詔

勅王曾等省所奏為朕本命之辰就本命殿開啟靈寶道場三晝夜設醮二百五十八分位及禮念真經聖號祝壽錄功德疏一道上進事具悉卿等總司靖館循舉僊科屬予元命之辰祇率棲真之士夙陳黜席刻誦寶文既善頌以咸周爰露章而列上眷惟忠恪良切歎嘉故茲詔示想宜知悉

賜諸路節察防團刺史詔

進長寧節功德疏

卿素蘊忠規早隆朝寄屬母儀之誕節修佛寶之勝因祇貢疏文祝延壽紀副予孝愛深用歎嘉

賜河陽三城節度使夏守恩乞上壽不允詔

勅守恩省所奏為乾元節乞朝覲事具悉卿久陟將壇式臨邊閫屬朕誕生之日願陪會見之班委師律以方嚴鎮塞垣而尤重難徇封章之請但嘉愛戴之誠所請宜不允故茲詔示想宜知悉

賜河陽三城節度使并代州馬步軍都總管夏守恩乞歸本任不允詔

勅守恩省所上表臣齒髮漸衰心誠稍惰乞垂聖念許
覲闕庭儻未允朝天且乞歸本任事具悉卿逮事先朝
素懷方畧并護諸將往鎮邊陲遽請覲於中都洎求還
於本道倚威名而方重賴屏衛以尤深難徇所陳當體
茲意所請宜不允故茲詔示想宜知悉

口宣

賜契丹迴使副至班荆館御筵口宣

有勅卿等遠戒輶車來脩鄰好已成儀於歲聘方引導

於都門宜賜宴筵寵茲行邁

都城門外賜保大軍節度使同中書門下平章

事錢惟演御筵口宣

有勅卿寄重藩垣任兼文武協茲良日將首征途宜賜
餞筵式彰異禮今差某官某賜卿御筵想宜知悉

賜契丹賀乾元節人使至班荆館御筵口宣

有勅卿等肅將聘禮來慶誕辰言涉脩涂式臻候館特
頒宴賜用示眷懷今差某官某賜卿等御筵想宜知悉

班荆館賜契丹賀長寧節使副御筵口宣

有勅卿等來奉隣歡肅將信幣適臻都輦將錫宴筵眷惟涉遠之勤用表示慈之禮

天雄軍賜賀乾元節人使御筵口宣

有勅誕辰斯屆隣好彌敦卿等遠奉輶軒來脩聘禮宜頌宴勞式表恩勤今差某官賜卿等御筵想宜知悉

賜宰臣王曾御筵口宣

玉清昭應宮禮上

有勅疇咨台席昭事真祠惟置使以尤崇宜示慈而特

異體茲注意諒洽多歡今差某官某賜卿等御筵想宜知悉

賜賀乾元節人使迴至班荆館御筵口宣

有勅卿等來脩聘禮允備多儀屬輶馭之言旋命都門而飲餞用申恩禮當體眷懷今差某官某賜卿等御筵想宜知悉

賜契丹賀乾元節使副迴至雄州白溝驛御筵

仍傳宣撫問口宣

有勅卿等載涉歸途已臻隣境冒茲炎燠諒叶安和特

推茲惠之私用表恩勤之意今差某官某賜卿等御筵
想宜知悉

賜契丹賀乾元節人使迴至天雄軍御筵口宣
有勅卿拭玉成儀展軫戒道屬茲炎律載涉脩歧特賜
宴筵用昭厚意今差某官某賜卿等御筵想宜知悉

賜契丹賀乾元節人使至瀛州御筵口宣

有勅卿等來慶誕辰聿成聘禮眷言旋軫將及隣封載
惟戎路之勤宜舉示慈之典今差某官某賜卿等御筵
想宜知悉

就驛賜契丹賀乾元節人使朝辭御筵口宣

有勅卿等恭持信幣已達隣歡將整輶車言旋驛道宜
申宴賜用表眷懷今差殿頭陳延達賜卿等御筵仍差
樞密副使張士遜押伴想宜知悉

玉津園賜契丹賀乾元節人使弓箭御筵口宣

有勅卿等方居候館屬此暇辰特命射候庶其觀德仍
舉匪頒之式用昭眷異之恩已差樞密使武寧軍節度

使守司空檢校太師兼侍中魯國公曹利用押伴兼賜卿等弓箭御筵想宜知悉

賜樞密副使充祥源觀使張士遜禮上御筵口

宣

有勅卿任崇機軸職奉靈祠爰協良辰式頒公宴膺茲異禮諒洽多歡今差某官某賜卿等御筵想宜知悉

批答

賜樞密使曹利用等批答

省表具知翼翼名都肇基盛業煌煌靈物擢秀上冬卿等彌綸大猷感召嘉瑞既考祥于連葉乃稱慶于露章將順脩形嘉歎無已

賜樞密使曹利用等批答

覽表具知象日南都興王吉壤屬就盈之良月秀彼茁之靈芝爰示中樞共觀嘉瑞遽傳芳於史牒用稱拊于宸闈言念恪恭豈忘歎尚

賜宰臣王曾以下批答

賀正月三日壽星現
又於十二日再現

省表具知履端巧歷淑氣啟於東郊觀象靈臺祥星耀于南極叶長寧之誕節寔萬壽之元符載省封章請書惇史允賴將明之德聿昭孝愛之誠其在歎嘉無忘寤寐所賀知

賜宰臣王曾以下批答

賀壽星

覽表具知木正司方疇人觀象告維南之暉烈昭有極之常符卿等協輔重雍變和元化爰陳瑞奏祗達宸闈會逢誕育之期且獻壽齡之祝深為愛載尤切歎嘉所

賀知

賜樞密使曹利用等批答

省表具知淑氣布和啓夏正之首序祥星垂耀屬文母之誕辰允為壽考之符寔冠躔離之瑞眷惟樞近祗列奏封詳觀順美之辭深體愛親之志其于嘉尚寤寐增勤所賀知

賜樞密使曹利用等批答

覽表具知清律布和壽星垂象騰烈輝於南極符至治

于中區卿等登翊鴻樞招來上瑞因靈臺之列奏由車
府以露章授茂實于典經歸美祥于帷幄載嘉忠恪歎
尚寧忘所賀知

賜宰臣王曾以下批答

為宣示南
京芝草

省表具知商丘畫壤鴻業肇基忽騰菌蠢之英實總紛
綸之貺歸于布政之府表乃致治之功遽推美于渺躬
請傳芳于惇史載嘉忠恪宜徇奏陳

賜宰臣王曾已下批答

覽表具知維彼名都挺生靈卉詳觀圖牒之記最近天
人之符卿等斟酌化源招來瑞命乃歸功于帝室願垂
裕于圖書恭覽奏封良增愧尚

欽定四庫全書

文莊集卷四

宋

夏竦

撰

表

賀老人星表

臣某言伏覩司天臺奏老人星見於丙位者虛皇輔德
垂象著明式瞻有爛之輝允叶無疆之壽照臨所及慶
抃惟深中賀伏惟皇帝陛下恭已臨人齋居訪道參俾
開闔包舉藝文體虞舜之蒸蒸紹宣於先憲法周文之

翼翼對越於景靈授仙籙於禁門接真游於祕殿擁靈
休而益茂布仁澤以惟寬函夏同文天人交際以是上
穹凝命南極呈祥應春律以騰輝直天弧而絢綵實睿
筭延洪之應及庶民康阜之休臣等幸遇昌期叨塵近
職奉義和之奏式表於殊祥考甘石之經彌增於率舞
願書青簡永播鴻休懇至欣榮倍百倫等

賀昭應宮成表

臣某言良辰協吉恭館告成凡在照臨率同慶抃中賀
伏惟尊位皇帝陛下寅威體道慈儉時中順乾則以推
仁奉先猷而追孝至誠以臨億兆潔志以奉靈祇由是
景命昭通真圖申錫授太元之神策式集於皇儀倅曲
密之仙都肇營於祕宇度鴻龐之久制鳩壞異之偉材
揆日出以辨方候定中而經始尊三清之正位載嚴真
祖之庭範二后之睟儀爰設百靈之象罄欽崇之精意
極神麗之宏規工有技而成程物有珍而必效式屬仲
冬之序聿成大壯之功灑宸翰於銀題繁禧沓至列榮

班於金祀鴻慶方隆臣限守官曹恭刊帝籙顧莫陪於
著位但俯積於歡心抃蹈之誠曷異倫等

聖駕離京次日上第一表

臣某等言伏以奉祠方澤將奠于黃琮案御清畿初張
于翠蓋望徐鑿之效駕歷吉日以布和中謝恭惟尊位
皇帝陛下膺千載之期御元氣之辯總集瑞命已儀炳
于靈篇咸秩無文遂躬修于愍祀矧省方之伊始諒儲
社以無疆

第二表

臣某等言伏以百神率職方祀于地祇五輅鳴鳶式遵
于時邁中謝恭惟皇帝陛下紹休聖緒茂建民中蘭葉
獻圖已勒封于岱岳黃雲覆鼎更昭薦于汾睢竊惟三
辰之祈俯經千里之甸賴一人之有慶固萬祥之畢臻

第三表

臣某等言今月二十六日入內內侍省內侍高品譚元
吉至伏蒙聖慈特傳宣撫問者翠蓋時邁將愍祀于汾

陰使者星馳遽側聆于天語俯炳丹青之旨如親咫尺
之顏中謝伏念臣某等幸遇會昌久塵祿位屬省方于
睢壤俾留鎮于都畿雖比屋之民富庶而既教揚法之
地桴鼓而不鳴豈茲禱昧之能治此浩穰之俗縱虔遵
于訓典庸莫副于倚毗恭惟皇帝陛下文致時雍德膺
天慶靜則合宮衢室垂衣裳而嚮明動則溫洛榮河授
龜龍之薦瑞已垂鴻于陽祉遂昭事于柔祇蓋致孝于
兩儀亦祈民之百穀垂聖心于覆露軫臣下之勤勞臣
等未效涓塵特邀眷待王言所被與華袞而同褒睿旨
初聞共陽春而交感誓罄匪躬之節上酬不報之恩

第四表

臣某等言伏以肅若舊典肇禋明神祀方澤之皇祇望
屬車于馳道臣某等恭惟尊位皇帝陛下重光御極上
聖膺圖方展儀于河汾蓋推功于天地風后陪乘羽衛
由是綦嚴蒼靈奉塗福祿以之攸降

第五表

臣某等言伏以崑祀高睢星言法駕將展省方之盛禮
式符後后之群心中謝恭惟尊位皇帝陛下廣采堯仁
升聞舜德答三靈之蕃祉宣二聖之重光伸孝享於郊
邱奠皇祇于冀壤既集禮神之館佇聞寶鼎之歌王度
之貞式如金而如玉天道下濟固為龍以為光臣等迹
遠陪銮心馳就列帝車爰至莫參禹會之期日馭將施
但效封人之祝

第六表

臣某等言伏以五壇巡祭昭事于汾睢萬國駿奔同趨
于禹會方恪居于官次莫親奉于天顏中謝恭惟尊位
皇帝陛下誕受丕圖欽承寶命致美散冕而九廟儲休
絜粢牲牲而百神薦祉帝德廣運咸獲後后之人皇澤
如春載洽懷生之類

第七表

臣某等言伏以國家振舉闕文講求緝禮順蒲人之望
幸嚴汾水之親祠中謝恭惟尊位皇帝陛下建極臨民

握圖聽政方鳴鳶于軍道將奠玉于嘉壇諒洋溢于謳歌允飛騰于英茂惟天為大如日之升

第八表

臣某等言恭以國家順河汾之後后奠牲帛于柔祇諸侯陳執玉之儀多士結望雲之懇中謝恭惟尊位皇帝陛下明德恤祀展義省方歷覽于圖書之淵齋祓于靜寔之館大車弭節方嚴穆穆之容祥風統壇將降穰穰之福臣某等恪居官次馳戀皇軒除地給薪莫詣侍祠之列拖紳鳴珮深懷拱極之心

第九表

臣某等言得行在進奏官狀報伏承今月某日皇帝躬祀汾陰禮畢者無文咸秩表上聖之寅恭明德惟馨見至誠之昭荐崇龐鴻之大業舉曠絕之盛儀降及飛沉率同懽忭中謝臣某等聞乾知大始而坤作成物混元之大化也父事于天而母事于地聖王之至孝也洪惟厚載職彼資生配剛健于運行兆陰靈之正位成周之

莫大澤由八變而出地祇炎漢之祠素汾升五壇而集
神既若時能事屬在昌期恭惟尊位皇帝陛下睿覽穆
清至仁淵靜挺克明之睿德紹累洽之鴻基帝頊依仁
奉若于天道唐堯稽古於變其時雍聲明文物之相宣
雍容揄揚而咸若六府既正九叙惟歌向以穹昊儲休
圖書錫瑞奉符展案既增喬岳之封勒崇垂鴻聿大丕
天之律已推功于上帝肅昭事于柔祇蘭臺時英稽四
廵而獻頌蒲津黎老願萬乘而啟行丹詔往俞近臣先
置聖心虔鞏而戒事靈物紛綸而降祥若影嚮之相隨
明天人之交際及清畿時邁法駕星陳華蓋承辰見惠
風之和暢黼帷藻野屬春是載陽洎升壇荐鬯之辰
受嘉氣商雲之應百靈效祉豈惟三燭之神光萬祥畢
臻不獨登歌于寶鼎懿鑠度越于千古休烈烜赫于四
方豈鑿井耕田而不知固跂行喙息而遂性巍巍蕩蕩
諒無得而名穆穆皇皇知大事在祀臣等親逢旦暮仰
頌形容艷宮會朝莫陪于法從明堂上壽即奉於辰嚴

第十表

臣某等言伏以汾曲裡嚴已畢奠琮之禮方明朝會式
陳班瑞之儀就克日以馳誠祈舜聰而逖聽中謝恭惟
尊位皇帝陛下體乾立極抱一居尊齊律度于萬珠寶
慈儉于六合聲教所暨盈溢于天區德澤滂流汪洋于
海外故得荐膺景貺紛委嘉符岱岳增封蒼三靈之蕃
祉漢睢親祀收百代之闕文擁社稷之神休顯帝王之
能事今者嘉壇襲吉懋燎升煙九壤蒸黎仰太陽之委
照上都耆艾俟鳴蹕以傾心皇猷已冠于古今令譽更
孚於夷夏伏冀皇上陛下早迴仙仗歸格神京治庶彙
之由庚俾普天之同慶臣等保釐京邑夙夜公家盡瘁
之心敢忘於丹臆拱辰之列佇望于清光

第十一表

臣某等言伏以禮崇盟鬯既頒賜於汾祠孝享園陵適
親臨于洛邑矧王畿之接畛迎制蹕以傾心中謝恭惟
尊位皇帝陛下懷柔百神同風三代聖德加乎海內文

教溢于天區道人采詩已拱于夜誦諸侯執玉率慶于會朝惟象魏之在瞻諒中外之禔福

第十二表

臣某等言伏以齋禮神之館已升燎于高雎登頌祇之堂方迴輿于近甸望軒遊而俯邇瞻堯日以歡心中謝恭惟尊位皇帝陛下精潔明禋講求逸禮素分奠玉已昭魚舞之祥溫洛受圖更顯鳳銜之瑞矧休應之紛委屬詔蹕以言旋式宴清宮洽皇恩于愷樂受釐宣室凝帝道于穆清

第十三表

臣某等言伏以鳴玉鑿于汾水已殫報本之誠蔭華蓋于洛都載展奉先之孝仰鴻儀之備舉肅禁衛以言旋中謝恭惟尊位皇帝陛下敷祐四方交修百祀為人祈穀驗膏澤于豐年采詩觀風知民耕于帝力日馭方迴于黃道塗歌先洽于清畿

第十四表

臣某等言伏以禮盛親祠膺三靈之睠命慶成歸格順萬國之歡心仰日馭以非遙望翠華而窈怍中謝恭惟尊位皇帝陛下恢崇鴻業宣暢皇猷尚質貴誠已肇禋于泰折布德行惠復統政于明堂授時之令惟新及物之恩彌廣

第十五表

臣某等言伏以方鼎升庖神既歆于嘉享徐鑿弭馭詔以示於先期瞻有穆之晬容祝無疆之景福中謝恭惟尊位皇帝陛下丕承聖緒光闡帝圖唐堯稽古而聰明高陽潔誠而祭祀察事地之禮嘉生由是均和修頌祇之書豐澤以之大賚式臻神貺允集天休臣等目注迴輿心馳迎蹕望六龍之御莫及于前驅率百辟之班竚朝于近甸

第十六表

臣某等言今月二十五日龍圖閣待制查道至伏蒙聖慈以車駕還都特賜詔書撫問者伏以方澤尊琮禮成

於嚴祀皇輿復路詔示于先期辱聖睠之便蕃走懼聲
于遐邇中謝恭惟尊位皇帝陛下重光御極執象臨民
懷生被廣育之仁制禮盡大中之道濟河之日克承刻
玉之文祀汾之初漢膺寶鼎之瑞既協坤靈之薦祉猷
瞻日馭以言旋臣叨荷宸衷俾司留務無涓塵之微效
有葵藿之至誠薦沐鴻慈俯頌芝檢捧媯泉之綠字賁
大帝之寶文聞效駕于和鑿固踴躍之無極藏賜書于
巾篋寔榮耀以難偕

第十七表

臣某等言伏以瑞氣宵凝即顯坤靈之薦祉懼聲雷動
式當詔蹕之言旋凡屬照臨悉同懼忭中謝恭惟尊位
皇帝陛下帝德廣運人文化成順萬物由庚之宜考太
一省方之義撫空桑之瑟已降于地祇清甸師之畿即
回于雲罕俯茲青陸更擁鴻休

賀五色雲見表

臣言伏審今月二十日聖駕至真源縣有五色雲見者

徐鑿夙駕總馱於名區卿霽晨敷流暉於紫宙繁禧允
集率舞咸同竊以雲物凝祥簡編攸載帝鴻紀事肇采
於官名虞舜協華賡歌於瑞命蓋太和之積粹疇至德
以呈符仰屬昌期愈彰丕應恭惟尊位皇帝陛下叅侔
遠古率育黎蒸紹隆累洽之基懋建太寧之化寶圖候
日丕顯於靈猷真祖在天茂昭於道蔭式舉朝修之禮
彌臻顧誕之祥當茶館之齋心有非烟之効祉紛綸絢
采散赤水之餘霞煥衍騰文凝吉雲之曉露聳羣瞻而
慶異垂信史以彌芳昭萬壽之遐齡迪三清之景祐某
限居原本宜從鸞旗仰聽殊尤唯增拊蹈

賀奉祀太清宮禮畢表

臣某言伏觀詔書今月某日奉祀太清宮禮畢者茂典
慶成繁禧允集照臨所暨拊蹈咸同中賀伏惟皇帝陛
下寅畏時中惠和逮下丕承帝籙紹舉於皇儀欽奉真
游躬聞於道誨爰徇黎元之請虔趨仁聖之祠達精意
於蕭薌薦鴻名於寶冊誕受聿懷之福允濟雍熙茂昭

善貲之人永宣至治

賀尊皇太后表

臣某言伏奉某月日勅尊太上皇后為皇太后恩覃日下歡動天中中賀伏以皇太后坤德合符陰靈表慶化光宮職道贊國風伏惟皇帝陛下仁聖宅心文明恭已尊承孝理嚴奉慈顏獻寶綬於內朝宣玉冊於中禁彰明后順知陛下就養之勤表正母儀見陛下歸安之盛萬國所繫四方是刑台臣之懇願既申品物之歡心斯

洽

乾元節賀表

臣某言伏以鴻明代照累洽於昌辰景貺洵彰親逢於誕節書文所混歡抃攸同中賀恭以皇帝陛下淵德日躋聖猷天縱靈承道蔭祇率貽謀啟歲誦之廣塗游文章之奧府驅除微蘖分判於忠邪遴東材臣將明於憲度總周文之九德兼虞舜之大功絕俗來同繇區作乂後天獻祝咸慶於茲辰拂石延祥永隆於大業臣頃持

荷橐久事龍潛貧賤難工孤寒寡援百城剖竹徒傾就日之心萬壽稱觴莫預在庭之列精虔禱願倍百常鈞

又

臣某言伏以燕謀啟慶神告昌期虹渚流光天垂景貺當真聖挺生之旦乃炎靈累盛之朝罄率土以頃心效華封而獻壽臣誠歡誠抃頓首頓首伏惟尊位皇帝陛下躬膺駿命寅御寶圖纂隆三后之基冠映百王之表屬正陽之紀月廼甲觀之誕辰慶叶千齡歡同萬寓臣攀鱗最舊補袞非工方守鑰於留都阻稱觴於秘殿帝暉有赫遙傾就日之瞻宸筭無疆仰極後天之祝

賀立皇后表

臣某言伏覩進奏院狀報今月十八日立皇后准勅十一月三日行冊禮者禴組撰儀穀圭展禮統宸闈而有典佐景命以無疆凡在懷生不勝大慶中賀臣聞易贊坤厚所以配乾元詩詠閔睢所以始王化塗山登而翼夏媯汭降而興虞蓋資內助之勤式畫外刑之美恭惟

體天法道仁明孝德皇帝陛下眇觀振古為憲太寧追
孝祖宗務嚴於裸獻觀象日月用廣於照臨考隆鷲之
美祥卜倪天之異表金螭玉檢載嚴徽冊之容瑤爵禕
衣將助太宮之薦臣以違表著遠守封圻委珮在廷莫
陪於鼇拊疑雲入戶但仰於暈儀欣戴之誠倍萬倫等

賀皇子慶誕表

臣某言伏審今月五日皇子慶誕者吹銅御和效禕毓
粹受震主器宗廟增威凡預含生罔不載躍中賀伏惟
皇帝陛下德澤滲漉神施丹青軫上仁于九圍襲太和
于萬有時應積累之祚仰寤熾昌之符瑞啟前星祥開
一日華封祝聖協多子之善辭太姒續徽騰百男之嘉
頌臣方司謫戍遠駐邊屯阻陪辨色之趨上慶重輝之
美

賀皇太子授官表

臣某言進奏院狀報伏審皇子授守太尉忠正軍節度
等使封壽國公者宸闈集祉天序飛榮書軌所臻人祇

交慶中賀伏以帝出萬物蒼震效乎長男龍見大辰前
星表乎世子蓋知有國之重莫越元良之尊允屬熙辰
宜崇鉅典伏以皇帝陛下眷徽百度為憲太寧忠厚以
布淳風吉蠲以修明祀萬國被澤溥洽於至和三聖在
天日監於盛治以是璿源濬發真蔭誕章義御吉祥天
枝毓粹洪惟初載之美丕顯徇齊之姿仰尊宗廟之威
頗緩景風之拜是稽禮制肇啟國藩襲惟帝之舊封承
曼壽之遐祚瑞發文象歡震華戎凡在有生率同大賚
臣出司邊警方謹秋防阻詣太微之朝仰慶少陽之德
望雲載躍倍萬欣榮

留司官吏賀表

臣某等言伏覩進奏院狀報十二月三日冊婉容張氏
為貴妃者揚命外朝講儀中禁褻進天妃之貴順承宸
極之尊盛典惟行羣生共慶臣等誠歡誠抃頓首頓首
恭惟尊位皇帝陛下穆清居位濬哲在躬舜治無為禹
功不伐既格太寧之化允資內輔之賢申勅柄臣奉將

冊禮分采章於六服冠品列於九嬪彌增軒曜之光實
亞坤儀之位用宣陰教永助帝猷臣等幸預通班獲逢
熙運仰宮闈之多慶傾海寓以同歡

欽定四庫全書

文莊集卷五

宋

夏竦

撰

表

謝加承奉郎表

臣某言今月某日進奏院遞到勅牒一道伏蒙聖恩加
臣承奉郎仍放朝謝者告瑞公朝獲三篇之秘牒覃恩
庶品降五色之乾文寵耀踰涯驚惶失次中謝臣聞魏
開宸厯階號爰分唐據帝圖散官攸設所以旁昭等列

下懋勲庸在我良時爵為華貫恭惟尊位皇帝陛下元
 功無際靈貺薦臻馭萬國以器名勵羣臣以祿位苟非
 久歷年所克荷官常則命不虛行恩無妄受如臣者學
 慚多士官忝屬丞素微橫草之功獲被如春之澤敢不
 盟心白水誓節青松請纓當効於終童求試願希於賈
 傅庶傾塵露上答蒼穹

謝直集賢院表

臣某言蒙恩以本官直集賢院者北門禁省給青簡以

試言東觀直廬降紫泥而命職莫道假人之器

案此語疑用左

傳惟器與名不可以假人之意但與莫道二字文義乖
 隔考宋文鑑器作刺又與假人二字文義不貫疑當作
 儀人之刺用詩曹風意以自謙則與莫道二字彰遇主
 字文義相屬矣但無別本可証姑仍其舊

之榮中謝竊以承明設待詔之官寔漢朝之芳潤麗正
 啟修書之院乃唐氏之英華濬圖書之淵澈龍鳳之署
 自非弓裘繼世章句名家通授羲畀似之靈篇閑書笏
 珥形之故事則何以繼成康之嘉頌考宣武之懿文陪
 法從於甘泉奉宸游於屬玉况當聖日允屬簡求如臣

者學不傳經文非近史青青子佩雖見刺於勞心翹翹
錯薪亦濫期於刈楚筮仕勝衣之歲薦名象日之畿方
博帶以觀光遽墨衰而公牒尋遇國家誕敷尺詔增廣
六科方棲枳以徒勞遂上封而自薦始較文於鼇苑旋
試可於鼎司亟趨文石之墀遂忝延英之問擊轅度曲
敢望於九成縈帶分墉俄登於百雉陞象河之屬吏佐
分虎之方州爰受代於瓜時遂歸朝於幄坐典陳陳之
粟閱山委之邱區從九九之車總絲棼之案牘暨還衡
睢壤舍爵太宮既諧引籍於金閨將佐于蕃於熊軾又
慮沉迷簿領廢墜簡編負公朝振舉之科辜聖主詳延
之意遂殺青而奏技果出紵以推恩禁林俾試於雕蟲
書殿遽令其抱槩閱上帝之冊府目眩星辰登道家之
蓬山足踐雲氣奉長者之餘論與先生而並行分直石
渠地接嚴更之宇縱觀金匱門連著作之廷載惟螻蟻
之軀莫報乾坤之賜恭惟尊位皇帝陛下事寢廟以至
孝奉靈祇而克誠流鴻藻於絕垠鑠景炎於往號以文

明而行健體柔克以居高縱觀唐漢之大猷脩舉黃虞之故實睿藻和而六同韻天章麗而五佐飛恢崇務廣於斯文獎擢不遺於小道遂使至孤之士獲塵非次之恩東陵遽擬於西山羔裘遂登于狐腋歌衛風而合雅鬻齊紫而雜良誠當潔節於素絲敢不盟心於白水益三思而出話彌九復以窮經永冰淵惕勵之心奉日月照臨之鑒庶追素飡之謗仰疇明王之知媿懼所深兢惶不已

謝賜昭應官判官兼賜章服表

臣某言伏蒙聖慈賜臣勅牒一道官告一通授臣本官充玉清昭應官判官兼賜章服者欽承恩渥俯積兢榮中謝伏念臣幸會亨期最為孤進自先臣之盡節始泐牒以效官折腰初佐於縣庭承乏遽忝於州幕偶六科之選士趨三府以試言擿埴索塗設攀於僞軌以蠡測海謬對於聖題纔叨上第之榮遂忝屬丞之命佐憑熊於丹嶠屬撫玉于雲封亟遷秩於芸扃旋侍祠於汾

壤由是升華仙室引籍於朝闈較藝禁林振纓於學館
踐宣猷之近省脩太史之後陳紬百氏之格言緝兩朝
之大典兼總金刀之務俄塵諫諍之司顧蹇蹇以無聞
但容容而自愧矧屬舊臣居守特預於賓從元輔朝脩
爰司於奏記念踐馭而無取荷東擢以尤深書言動于
宸墀總勾稽於會府夙宵一志雖堅金石之誠尸素十
年莫著涓塵之效此者伏遇尊位皇帝陛下虔尊道奧
祇若靈心奉三境之真文紹九重之聖緒體密都之神麗
擴恭館之穆清地有寶以皆呈山有材而必効聿舉慶
成之典載嚴置使之規皆眷命于公台式尊崇于憲度
仍分衆職肅奉攸司載惟倖事之臣允極當朝之選尤
謂博求鴻碩登用雋良豈意顛蒙誤膺推擇授之綸綍
寵以金章錙瑤佩於絳臺曼希於仙品奉藻書于紫館
絕異於慈榮重念臣本以孤平素無伎藝微近親可以
仰給乏先疇可以取資唯賴鴻私妄階榮路爰從樂育
以跂甄陞未有秋毫不由帝力天高地厚固報德以無

階恩重命輕誓竭心而有素敢不服勤官次祇事真庭
永堅夤畏之心上副欽崇之旨

謝知制誥表

臣某言伏奉制命特授臣尚書禮部員外郎知制誥依
舊玉清昭應宮判官同修起居注同管勾景靈宮公事
散官勲賜如故者紫微祕掖獲書命之司丹屏儀曹叨
奏疏之任仍兼載筆尚贊殊庭恩獎特隆心顏無措中
謝竊惟二帝常典以雅奧成章兩漢訓辭以深厚為體

上則記言于國史次則視草于臺郎洎當塗應期建通
事之職至天監在御有知誥之名命令攸資選授殊重
李唐之盛良士繼登奉四禁于鎖闈總六曹于畫省在
夫掌畫尤聳殊榮况屬昌辰彌彰異舉自非豐規茂識
瓌質明姿則何以藻潤帝謨暉華時望如臣者文非近
雅材不逮人幸對昌期最為單緒而自諫科賜問學館
升華抱槩宣猷類芳塵于往躅汗青史閣頌鴻烈于先
朝由是分披錢刀佐司筦籥遂叨書于言動仍遷掌于

勾稽日就月將僅成于注記朱出墨入纔辨于網條伏
遇國家觀象密都奉符恭館適慶成而置使俄倅事以
叨榮矧屬壽域歡康飈輿降格廣太微之憲度昭事于
九皇集灞會之威神欽崇于五鎮遽膺明命並預攸司
夫何瑣微有此榮慶敢不齋心紫府竭慮清場仰體精
衷肅祈靈鑒然而顛愚難變震慄倍增未嘗苟悅于人
亦無微忤于物重念臣藝文至陋資地素寒衡門本乏
于官榮先父止供于傳遽在臣所得揣分已多雖白首
以不遷亦甘心而知幸豈謂尊位皇帝陛下仁深昭遠
道極包荒濬發鴻慈主張孤進特預傳于密旨俾先示
于試期仍親擇于近題用曲全于情學拔之羣萃置在
清華玷郎選而甚優伏王言而斯重暨兼修于衆職寔
茂聳于榮觀特達之恩固無階而可報懇激之意惟刻
骨以自銘誓當更効涓埃倍懷霜雪秦官漢表博考于
舊儀周誥湯盤鋪觀于大要或奉真之暫暇即溫故以
求新庶逃彼已之譏上答非常之遇

謝授戶部員外郎表

臣某言伏蒙聖恩特授臣尚書戶部員外郎依前玉清
昭應宮判官知制誥同修起居注同管勾景靈宮會靈
觀公事散官勲賜如故者蘭臺約史本無塵霧之勞畫
省分曹遽進版圖之職顧增華於清禁寔交悖於營魂
中謝伏念臣胄緒單平藝文淺陋而自父兄早世族屬
無依弱冠自公但異寒宗之有後遺孤聚首止期寸祿
以代耕豈意逢辰曼踰始望翠繡華組早齒於貴遊秘
掖殊庭繼塵於清選既容容而味進故碌碌以無聞乃
者伏遇國家頌次先猷總裁大法獲編聯於注記或是
正於疑譌最處後陳莫効覃研之力尤為未至魯微歲
月之勤詎期金匱之成書將預龍綸之第賞况臣近叨
殊渥蓋未踰時猶夕惕之不遑何寵靈之敢覲豈謂雲
雷播澤靡間於寒暑日月分暉遂通於幽隙載循非次
實媿微榮此蓋尊位皇帝陛下昭式孝思俯矜微物察
其遇主本不因人申九重特達之知開四海孤寒之望

靡拘常牒務表鴻慈敢不更勵疲頑仰承丹采心非木石固舉族以銜恩命等蜂蛾奈無階而報國唯誓夙宵之志仰疇燾育之仁

謝授禮部郎中諸宮觀充職表

臣某言伏蒙聖恩特授臣尚書禮部郎中依前知制誥同修起居注充玉清昭應宮判官同管勾景靈宮會靈觀公事散官勲賜如故者恭館慶成方均于大賚嚴宸第賞猥及於無功聞命已還揣躬增惕中謝伏念臣材質駑下門緒寒微金馬之中乏葭莩之薄援赤墀之右無蟠木之先容不謂逢辰誤塵清選殊庭倅事已聳於榮觀禁掖代言更踰於始望每勵省循之志深懷止足之風此者伏遇國家挺尊祖之鴻徽載崇於祕宇奉奠方之明德並進於嚴祠既成大壯之規載洽斯干之詠爰曲覃於茂典特進秩于中儀揆景僞工既非於已力偷榮昧寵實媿於朝倫此盖皇帝陛下樂育羣材主張公道憐其遇主本不由人曲持特達之恩用慰單平之

望天高地厚欲報德以何階藥苦冰寒但誓心而有素
周章感懼倍百常鈞

洪州到任謝上表

臣某言伏奉勅命就差知洪州軍州事已於今月十三
日到任禮上訖者孤宦沈迷累更於郡組隆恩橫貸復
序於藩條惟忖已還心顏靡措中謝伏念臣天資淺薄
門緒悴寒幸會先朝誤階榮次虔遵孝治冒觸寬科戚
既自貽藥將安違仰賴天宥尚剖左符繼典五城連更
七祀眩瞽滯疾圈養自安孤苦餘生零丁滋甚徒索累
鍾之奉絕無橫草之勤竊自憂惟合從澄汰豈謂伏遇
尊位皇帝陛下哀矜庶品保宥羣生躬奮乾剛肅持威
柄恩豐漏目貫餘黨於銅山禮重齋心登正人於玉鉉
剷除弊扭崇起化樞事無善而不旌材有長而畢錄而
復勤哀舊物澄洗非辜太和洽於萌生廣照鈞於隙穴
豈意傷摧之末猥叨拔拭之私載錫裝錢就升州寄矧
茲洪井實表重江襟帶七閩咽喉百奧使驛相係軍府

是竒地望頗雄祿廩殊厚敢不重蕪肝膽罷怯於虛弦再
整筋骸漸圖於實效永期糜潰少謝悃矜

辭起復知制誥表

臣某言伏奉制命授臣起復知制誥者私門凶咎餘喘
僅存上聖矜嗟隆恩猥及聞命交悸悼心靡圖臣某誠
哀誠懼頓首頓首伏念臣門地素寒父兄早世而自操
觚學舍結綬仕塗唯母與臣更相為命遽邁靡依之痛
何勝罔極之哀而况宅兆未安杯圈如在蒙慈幼之育

凡四十一年報免懷之恩止二十七月豈可遽忘

原本缺
二字

亟襲衣纓自顧餘生彌增鉅痛伏望聖慈念臣執喪日
短報國日長許事几筵俾終祥禫永將軀命仰答恩私

謝起復知制誥表

臣某言伏奉制命特授臣起復尚書戶部郎中知制告
散官勲封賜如故者哀紀稱情未報劬勞之德宸慈念
舊忽膺圖任之恩祇原本缺一字靡從拜受增惕中謝伏念
臣如弦謬直伺免本愚不知巧宦之方但罄樸忠之節

先皇帝憐其若是愍以至孤俾入事于龍潛實久趨于
鶴禁單平寡援間隙易乘由是出守一麾連更六郡九
年電擊萬里火馳層闕連雲止期于夢到殘骸予影敢
奠于生還適屬咎積私門悲纏陟屺爰扶旅視遠泛重
江四海無家指都畿而歸葬六親聚首顧生計之屢空
毀滅未能饑寒是迫豈謂伏遇尊位皇帝陛下體天育
物愛下延慈記蕃邸之舊臣軫穆清之聖慮特頒賻贈
俯卹哀惻方祇奉于幾筵且漸營于宅兆冀終喪制式
罄孝思豈謂皇帝陛下再軫宸衷俯矜微物特降奪情
之命曲垂牽復之文戴重施以何勝還故棲而增感謹
當書心誓節刻骨銘肌

賀皇太后表

臣某言伏受制命特授臣起復尚書戶部郎中知制誥
散官勲封賜如故者寢苫堊室方深在疚之哀書贊紫
垣遽奉奪情之詔仰膺恩典靡措心顏中謝伏念臣胄
緒單平藝文淺陋孤寒寡援唯盡力于公家愚直無謀

但竭忠于臣節果由譴累出守藩條奔走九年既無于
替日艱難六郡敢望于生還爰屬偏親奄終暮齒式遵
治命歸葬近畿繞繚風波偶存于性命零丁賤累共迫
于饑寒命也奈何計將安出豈謂伏遇尊位皇太后陛
下聖謨天縱睿照神資洞察下情勤哀庶物念臣夙懷
忠鯁仰事先朝知臣粗守行藏絕無資計特頒賻布大
濟窮塗方卜葬襄異終祥禫豈謂皇太后陛下復排羣
議再簡慈衷俾起授于前官仍靡容于固讓枯骨復肉
死灰重燃為恩甚明舉族難報敢不盟心金石勵志雪
霜上酬覆載之私永誓蜂蟻之命

辭加食邑表

終堂之戚卜吉祭於在辰連土之封荷彛章而錫寵拊
哀懷而靡寘拜嘉命以不遑臣某誠哀誠懇頓首頓首
伏念臣迹本羈孤噐惟隘薄誤被先朝之眷早陪禁闈
之游更領左符粵在外服比丁釁罰俯就喪居幸逢繼
照之期曲沛奪情之命復司言之舊職忝進牘於近庭

仰懿律之惟幾敷邇猷而靡告繼升樞府預贊前籌年
穀既升方及外除之變樹風不止彌懷欲養之悲敢謂
伏蒙尊位皇太后陛下特軫慈襟曲推渥霈因祥事禫
安之始錫采邑陪敦之榮念制爵之匪私矧謝朝之有
典冀獲收於換汗庶無重於忝踰然念臣猥以芻微甫
叅柄任導夙夜之基命雖昧善謀承日月之末光已驚
榮會矧茲名物之設厥有等數之差苟曲澤之荐沾亦
多言之可畏實祈惟睿終賜保全干冒鴻慈臣無任祈
天瀝懇激切之至謹奉表陳謝以聞臣某誠惶誠懇頓
首頓首謹言

潁州到任謝表

臣某言伏奉勅命差知潁州軍州事已於今月十二日
到任禮上訖親見吏民奉宣溫詔因望京闕乍遠邇顏
中謝伏念臣世本孤平業惟文史先臣盡節以忠孝傳
家真廟臨軒以賢良中選莅職數十次效官三十年四
海憲章編研稍脩三朝史策頌次繼成雖無可紀之勤

頗勵當官之志而自一陪鈞軸再貳樞廷固欲罄述遠
猷極陳時弊不惟事由深隱於衆意之罕同而又職在
叅禘終大議之難立但務愛君竭志率職勵精輯理軍
防裁處邊奉祥言正色規檢於武臣潛計密謀周旋於
兵要耻捷給口吻以揣摩上心耻結託朋游以自為身
計七周年籥三奉禋燔顧每速於人言亦屢移於病告
既無顯著之數大妨賢雋之塗賴聖鑒之保全得列城
之息偃陪京匪遠庇族頗優此蓋伏遇尊位皇帝陛下
念臣早奉龍姿最為舊物憐臣遠事先帝本是常材惟
天地之至仁務從善貸記犬馬之前效特出異恩省過
以還感極以泣乍遙旒宸方事米鹽保庇之慈雖君親
之是賴孤危之跡誓寒苦以自疆冀集涓塵少裨海岳

青州到任謝上表

臣某言昨奉勅差知青州充青淄等州軍安撫使已於
今月十四日到任赴上訖中降命書外遷候服循涯已
過銘骨殊深臣某誠感誠忭頓首頓首伏念臣本以孤

生早塵上祿不自揆度強學古人之為何意遭逢遂蒙
聖主之眷盡忠圖報無意他防勤勞一事以未成讒嫉
萬端而已構蓋朝倫之共棄獨天造以曲全假以清資
付之近郡始再更於年籥適就改於州麾素稱表海之
雄乃重撫封之寄事權增大職業夥繁此蓋伏遇尊位
皇帝陛下至德兼容大明回照察臣本由直道知臣不
避衆嫌每聞譖毀之辭常加庇護之意矧推異渥復委
要藩臣方知向之所存果非失道死而後已誓不改為
永堅愚懇之心上答睿明之施

辭刑部尚書表

臣某言今月二十一日三班借職張守珍到州伏蒙聖
慈賜臣勅牒官誥各一道特授臣刑部尚書依舊知青
州軍州事并賜詔書示諭者當官無狀議賞誤加載自
裁循交深震慄臣某中謝伏念臣本惟孤進逮事先朝
分珪組以雖多絕涓塵之可錄昨以東秦舊壤仍歲阻
饑猥奉詔函就分使指既營救之無策徒奔走以為勞

所賴天意照臨聖謨優假漕陝右之粟西下於洪流汎
淮甸之舟東浮於滄海出良繅於御府禱嘉雨于靈祠
經費已充豐潤斯洽至若賑恤貧窶禁止寇藪靡敢便
宜動皆奏列唯奉行於宸旨用祇率於列城雖歲穀之
遽登每簡書而是畏豈期誤寵猥及無功儻開多幸之
塗恐滋流競之俗重念臣名品已峻齒髮甚疎毗益無
聞蒲盈甚懼豈可暫驅使領便欲僥求貪朝廷之功以
為吏課掠州郡之効上冒主恩何待人言固當自訟伏
望尊位皇帝陛下俯哀舊物深軫上仁終始大恩保全
孤跡聽輟出綸之命俾安據蒞之憂如此則賞必及勞
有光於國體臣無虛授免瀆於朝經斯寔至誠固非文
飾言瞻白水可誓丹衷隕越戰兢期于得請

謝授刑部尚書表

臣某言今月二十六日進奏院遞到詔書一道賜臣伏
蒙聖慈以臣上表蒙恩授刑部尚書乞輟恩命宜不允
者寵章非次成命不回祇受以還震惶無措中謝伏念

臣人品至下天幸何多先皇初置諫科臣獨膺聖選陛下未離宮閣臣首事龍潛自以介拙無徒孤寒多難歷職二十許任效官三十餘年奔走四方周旋二府入朝見嫉固自古以難逃直道而行信安身之不易非先皇始終顧遇難立於危蹤非陛下特達保全豈至於今日報國絕一毫之效竊祿有五鼎之殮敢以無功更當誤賞每露章之至懇終睿旨之靡俞跪啟詔封交流愧汗此蓋伏遇體天法道仁明孝德皇帝陛下識臣面目察臣肺腑罔恤人言動由宸斷上則極至公之道昭勸於勤勞下則推求舊之仁敦厚於風化望九重而正遠恨萬死以莫贖敢不更勵樸忠俯安疲菽勉圖來效少答大恩

南京到任謝上表

臣某言祇荷寵私伏增感懼中謝竊念臣孤寒多難蠢直無謀頃事先朝首依東禁當內閣始開之日識太陽初出之輝抱槩和鈇皆真皇之密命解衣推食盡陛下

之深思式屬重熙仰緣前愛猥蒙誤寵擢預近司再貳
樞衡一陪台鼎粗守為臣之節載傾許國之忠三侍裡
燔七周年籥羣情寡合多咎其非才天鑒察微獨憐于
守拙獲均勞逸盡出保全一昨海表薦饑飛螟肆孽猥
分使指宣布朝恩上賴皇威獲清寇劇道途之遠歎旅
病以無醫歲月屢遷望威顏而莫睹方欲少須涼景虔
拜露章求換郡於京西冀遵途于闕下二對當陽之法
坐少陳東夏之遠圖退就蕃宣永藏頑鄙豈謂伏遇尊
位皇帝陛下俯憐際遇尚記姓名遽錫詔函俾司留府
惟茲劇地實首庶邦佳氣春陵夙比真人之里青雲洛
水聿興王者之都漕引江吳控制淮海使驛係路雖馬
馬之畢迎厨膳闕供顧雙鷄之不腆况臣筋骸疲繭蹤
迹單危懼速多言上孤親選願察守株之拙更寬如地
之容永誓靡捐上醅覆露

欽定四庫全書

文莊集卷六

表

辭戶部尚書表

宋夏竦撰

臣某言今月十九日馬遞到府伏蒙聖恩賜臣誥勅各
一道時授臣行戶部尚書散官勲封賜食邑如故者私
悃再傾寵章誤及俯循涯分罔措心願臣某中謝伏念
臣獲事兩朝僅踰三紀中外更踐微半策以堪書閎閱

自闕絕寸長之可錄幸尹興王之壞矧兼主籥之司地望甚高朝委尤重但以孟諸之澤舊為卑濕之鄉嚮夏載塗方冬未燥年光若是疾勢可虞是以甫及再暮恭布危歎冀更爽塏以避鬱蒸蓋仰戀於清宸望苟延於餘喘豈期天造特改地官載懼鑿墉甚於據茨若乃慶息均霈久次例選伏限通規所宜祇授而况臣東秦進秩歲始三周睢水書勞官無一善豈可因求僻左邀取恩榮倡僥倖之風壞廉恥之俗輿情共駭自訟何安伏惟尊位皇帝陛下盥食九重勵精百度夢卜得於賢佐物色訪於良臣方精汰於否臧難誤施於爵賞伏望陛下識臣面目察臣肺腑念臣稍涉藝文粗知廉恥乞却還於舊職誓永守於別都庶當責實之朝免累及勞之典天鑒在上公議盈庭儻不由衷必有餘戮寔非矯節願賜允俞

謝授戶部尚書表

臣某言今月六日進奏院遞到詔書一道伏蒙聖慈以

臣上表為授戶部尚書乞且守舊官宜不允者渙汗難
收絲言俯諭仰懼再三之瀆寔增俯僂之慙中謝伏念
臣本以諸生濫登制舉始踰弱冠即玷清流倖事殊庭
代言禁掖解衣推食辱先帝之深思抱槩和鉛首東朝
之盛選入奉溫文之德實逢初載之先進退疾顛寵深
多忌一辭雄戟日傾思愜之心六換魚符孰有賜環之
請伏遇尊位皇帝陛下虔膺寶命祇擁蘿圖總攬大猷
博尋舊物錫飛毫於神筆推奪禮於墨衰遽還復於故
棲驟參陪於庶政織縑難比對來寵以凌兢垂翅自傷
聽虛弦而墮越曲承大庇得守外藩東夏徃緩方搖於
寇竊南都內徙交奏於川涂以婞狠之姿處劇繁之地
通顏方隔浮議易乘所賴陛下察臣樸忠哀臣孤立委
曲明辨特達保全非賴此恩豈至今日百生盡節九族
捐軀細自忖量亦難報塞豈可因祈便郡更冒殊榮載
念滿盈甚於焦灼是以露章車府布款宸闈出綵已行
雖莫回^夫成命誓心至確固可質於明祇祇被寵私伏增

感泣此蓋陛下育材示惠圖舊敦風廣真廟之遺恩豐
壽藩之前愛力排羣議特簡聖衆將俯勸於事勞故靡
循於功次敢不竭心文札况瘁米鹽益勵志於桑榆庶
酬思於螢霧

謝授三司使表

臣某言伏奉制命特授臣依前行戶部尚書充三司使
加食邑五百戶食實封二百戶散官勲如故者寵章非
次衍食有加载省愚寔寔難堪克臣誠惶誠懼頓首頓

首伏臣臣本由孤進仰會先朝掌右掖之贊書奉西清
之蜜議真宗皇帝以臣父沒身報國最為忠義之家以
臣制策登科粗識古今之體察臣持循少過知臣憂畏
小心當陛下潛躍之初首東朝陪侍之選解衣推食最
承逮下之私抱繫和鉉日奉重暉之德適屬先皇違豫
邪黨擅權六改郡符十更年籥但盡心於民政已絕望
於朝庭伏遇尊位皇帝陛下出震承祧大明繼照猥思
舊物遠錫飛毫出自宸衷擢階近輔當母后臨朝之際

是權臣惡直之時更互留身婉轉騰謗以漂山之巨力
害如線之寒蹤非仰賴於保全已生成於糜碎又念全
齊舊壤連歲荐饑賊盜縱橫公私困竭臣猥分使指躬
按海壖晝夜兼行鬚鬢皓白未容殫於薄効已先著於
流言此際若非陛下斷自不疑察其非實力垂明辨幾
至傾危以茲重疊之恩未申分寸之報旋玷南都之寄
式當萬國之衝水陸徃還是非藪澤上酬厚祿惟竭節
於公家曾忤柄臣已灰心於榮路止期退伏遠避猜嫌
豈謂陛下深側上仁力排群議念臣孤寒多難察臣介
直無徒簡自聖衷擢司邦計破朝端之舊黨極天下之
至公祇受以還感極以泣唯當恭勤夙夜策勵疲駑直
剖肺肝少禩聽覽誓畢桑榆之景仰酬天地之仁

永興謝上表

臣某言伏奉制命特授臣奉寧軍節度使知永興軍府
事駐泊馬步軍都總管泾原秦鳳路安撫使已於今月
二十四日於本府上訖齋壇授受拜麗澤以惟優外聞

臨戎望嚴宸而乍遠寄付尤重感懼增深中謝伏念臣
出自孤生誤登制舉既踰弱冠亟掌訓詞抱槩和鉛首
預東朝之選解衣推食獨承先帝之知但以賦性至愚
立身多難權臣共惡象口爭非自揣卑危分甘捐棄伏
遇尊位皇帝陛下睿明繼體仁愍象天軫黃屋之非心
記青宮之舊物擢參台鼎再貳樞衡恥巧宦以依人惟
朴忠而自竭仰蒙聖庇獲守近藩旋以東夏撫寧南郡
居守三腰郡組六換年華每懷襍被之行敢有賜環之
望豈謂陛下力排輿議召委計司爰當視事之初便主
摘山之議羣情向背密䟽蹤橫非上賴于辨明已立成
於禍患尋以禋燔下詔賞賚均思為國盡忠雖明神之
可諒入朝見嫉鑒前世以堪驚嘗因賜對之間曾瀝由
衷之懇候終考秩儻議遷除只祈都省之便安或預譯
場之潤色庶未從乎外補得時望於迩顏况臣自忝三
司始踰八月唯自勤于本局敢輒預于朝經寔無片言
偶侵上位矧傷弓之最甚唯斂翼之是圖豈意羗戎妄

為狂孽不期公論誤及非才遽由端右之資擢授元戎
之寄臣出於將種粗讀兵鈐誓竭素心仰矚異遇其如
邊防務重京闕路遙動緊帷幄之指蹤方遂藩籬之固
圍敢祈睿哲更賜主張俾成橫草之功免累知臣之德
辭忠武軍節度使表

今月臣男都官員外郎安期到州伏蒙聖慈加食邑七
百戶實封二百戶餘如故者關塞宿兵未殲於寇劇藩
垣進律遽改於旌麾自揣非功豈當虛受臣某中謝伏
念臣猥承人乏擢總戎昭再從軍屯連更歲蓄千金空
費曾無拙速之謀數級未聞方省不能之請甘從吏議
以避仕途敢謂思章亟遷土宇虎符龍節韜節室以生
輝畫戟油幢擁和門而增壯然念兵氛尚盛外寇未攘
田井驚騷藩籬震蕩戎亭在望交湊於邊烽齎鉞空存
未塗於饜血豈宜爵號更及庸常此蓋伏遇皇帝陛下
任人不疑虛已求舊鎮以大體責其成功猖獗異謀固
非一日蒼皇守備恐失萬全乞更賜於主張庶漸圖於

翦滅南標銅柱素尚於伏波西出玉關敢希於定遠臣
無任感天荷聖激切屏營之至

謝授忠武軍節度使表

臣某言伏奉詔書以臣所上表為蒙恩授忠武軍節度
使乞且守舊官所乞宜不允即斷來奏者西遐叛寇未
即靈誅南夏奧區誤更寵爵恭膺詔版倍積覲顏中謝
臣聞漢疏國封由遠近為別唐制藩郡以雄望為差速
於本朝參用前典量次舍之遐適當功伐之重輕非服
大勞豈容妄受如臣者比從省禁出守邊屯雖死志厲
懷霜力圖盡敵終以不知兵草空驚歲時訖無毫纖稱
報思效衆訕以之空涌名論由是頓衰方乞避藏武敵
蹇短豈謂遽頒制命進改使麾驟加衎食之榮橫竊景
風之拜此蓋伏遇皇帝陛下勤哀舊物深惻上仁念戍
役之甚艱愍關防之云遠特訪攸司之議曲推外徙之
思責實靡聞無功增誚重念保邊之吏再歲以還或換
郡進資或書勞加秩兵衛職重止拜廉車勲戚地尊但

加留務臣獨涓剛日誕告外廷再刻印章重製旌節嚮則卿省並授是以近而為榮今則邊瑣遞遷矧以遠而為貴超踰儔匹度越等威不謂孤生冒此殊渥敢不根心勵下畢力防秩冀效涓埃仰瞻覆載

涇州謝上表

臣某言伏奉詔勅就差知涇州充涇原秦鳳路公邊經畧安撫使兼涇原路駐泊馬步軍都總管已于今月二十八日到任上訖祇奉選掄豈容勝荷中謝伏念臣孤

寒多難愚拙自持効官三十八年臨民十有一郡盡心報國竭節首公未嘗自叙勤勞苟求進用亦不潛附朋黨暗作階緣讒害至多顛危不一上則賴于聖世次則恃于明神况已及于暮齡誓不移于前節伏遇尊位皇帝陛下照齊日月道法乾坤辨臣子之忠邪察人情之直偽念臣速事先帝早奉東朝知臣靜退不爭察臣朴忠有素向者一離樞府六換年華陛下召自別京俾司邦計主摘山之議較射策之文定賞給之科設禋燔之

備動畏入朝之嫉始踰半歲之期陛下察臣孤危力垂
保庇屬填邊瑣付以戎貽矧閔輔之不寧洎邊防之少
警臣兼程到職庶事創圖奏牘寔繁蓋欲細聞於聖聽
當官不顧寔恐有誤於朝廷所賴陛下遠布宸聽力排
群議念臣不為身計務荅主恩罷陝右之劇繁付回中
之邊要詔函俯降使駟繼臨過賜撫存俾安驚惕惟臨
涇之孤壘控西鄙之要津賊境不遙烽煙在望戎事久
廢樓櫓未完敢不特創規模漸加綏葺又須陳請上浼
穆清乞倍賜于主張庶早平于猖獗皇天后土寔鑒丹

誠

永興再任謝上表

臣某言伏奉勅命就差充陝西路馬步軍都總管兼經
畧安撫沿邊招討等使知永興軍府事已於六月三十
日到任上訖全秦地重分陝寄隆私竊憂惟實難堪副
中謝臣聞忠臣結綬之始皆欲圖報於本朝義士執卷
之初盡期有濟於當世或則封陞徹警奉勇無自試之

塗或則貴要盈廷寒素絕干進之望鴟鷂困於羈縻琬
琰屈於煨塵眇觀舊編代有遺歎如臣者偶承人之出
守軍屯蠢戾逋誅暄涼改序連營謂之無勇隣城謂其
不能數級未辰何顏自處方祈退伏式避勞能豈謂伏
遇尊位皇帝陛下圖制國經召還樞輔盡以虎臣之職
付茲蟲篆之材俾攄轅下之勤得宣闡外之力上可以
建明策慮禪宗社之謀下可以進退否臧拯生靈之患
而况并護諸道總攝列城要駢組於閔中賓從動色陳
賜金於廡下營府相趨漸倚辦於官聯或有成於天幸
是則追芳往躅獲有竹帛之藏沒齒九泉免均糞壤之
朽敢不愈張膽勢益厲忠規戎警遂清儻擅三明之猛
思章盡在豈徒七寶之嚴唯冀廟朝更寬轡策察持邊
之至重念善後之為難庶畢銖分上疇覆燾

謝授宣徽使表

臣某言今月某日男開封府推官都官員外郎安期到
府蒙恩賜臣制告勅牒各一道授臣依前官充宣徽南

院使者外廷敷告近禁升崇賞異及勞感深淪髓中謝
伏念臣性慚弦直識本榆瞑列仕籍者四十年貳柄臣
者十五載一昨六周東夏式荷於賜環八月計廷未遑
於溫席委朱墨而提劍橈紳珮以厲鞮急驚秦關旋驅
隴道四遷歲景顧蓐寢以何嘗三徒軍屯恨脅疽之猶
滯宿師有日斂策未辰豈圖不次之恩誤拜宣猷之寵
入則奉承眷旨切近中樞出則統率戎昭總臨諸道銖
分罔効名數太優難忘失旦之愆仄有再然之異此蓋
伏遇尊位皇帝陛下記憐遭遇矜愍孤寒推東禁之舊
恩緣先朝之雅意念臣省闈並命止攀滿歲之卽邊瑣
例遷獨授遠藩之節夫心不忍聖造曲成置於五府之
後陳俾叅四貴之榮綴武非將表誠乏於雄稜形在目
中誓平於蠹戾庶階塵霧仰謝照臨

宣徽使乞換文資表

臣某言伏以文武設官所以審材用小大制祿所以辨
勤勞仰屬昌辰豈容冒處中謝伏念臣本由孤進幸會

先朝以直諒備史官以忠寔供言職斥姦邪之黨比咸
土木之修營以至外補江湖內遷藩郡剷除疾若賑濟
困窮累奉詔函繼襄吏課爰遇聖神出震聰愆宜慈靡
督前思遠頒宸翰旋由起奪入脩論思力抗強臣獨持
公議建明國制脩定刑章無一事曲佞官闡無一言陰
結朋援簾箔之內睿聽熟聞臺閣之間正人具志而自
出司東夏六換流年救海岱之飢生存之命億計平黃
腫之盜安帖之城十餘爰就改於別都亦粗修於治迹
以是景祐四祀進掌版圖寶元初年召計金穀摘山奏
格齊議論於參差備物成郊均賞賚於豐約適屬羌豪
背惠武旅乏人遽董戎旃出填邊瑣謀皆鑿空事必創
圖躬冒險艱常廢寢食若乃再臨鄴霸繼戍涇廊新斷
川涂肇營樓雉申嚴守備耻較力於干戈禁止交關謀
困賦於歲月圖上之策非一采擇之言亦多天地諒臣
盡忠吏民哀臣竭節但以數竒罕偶衆少難分不能飲
馬河源灌烽隴坻徒施固圉之力克謹邊防訖無汗馬

之勲能書竹帛逮終更而罷使叨善止以作藩勤遠至
勞積憂成疾是以懇祈內徙求復故棲雖叨中豫之遷
尚冒西陸之職露章屢上溫詔未從坐竊隆名又茲踰
歲惟經費之猶廣享厚祿以何安矧夫四貴之崇寔均
三事之重當任英武入宣聖猷至乃六蠹啟行萬錢賦
祿自非勇冠行陣功載旂常眇覲前聞未始虛授詎容
鈔槩之士父私玉帳之榮此者幸遇尊位皇帝陛下茂
育時材哀憐舊物責寔群后分治九圍伏乞念臣忝事
兩朝早更二府罄輸忠款恪奉官箴在公四十餘年夙
宵匪懈臨民一十五郡勤拙粗施冀以省闈前資計廷
舊職近司印綬兩鎮節旄改職文資俾安危懇誓竭當
官之效仰禱從欲之恩

再乞換文資表

臣某言伏奉詔書以臣所上表乞換文資宜不允者優
容過分震悸交懷中謝伏以四貴聯華禮次丞弼十連
作長寵冠公侯若乃擢從武人遷自勇爵固當永錫車

服遐佩印章其或素隸簡編蚤備臺閣偶緣戎警特假
將麾逮於終更理當罷使而况幅員至廣經費寔繁寧
候雖虛租更尚闕在於供擬猶減舊常豈容具臣橫叨
大祿矧惟五府寔總百工象樞極之運行繫宗社之輕
重端朝體國禮絕地尊詎宜州郡之寮妄廁巖廊之列
伏望尊位皇帝陛下矜憐衰老軫恤孤寒念一介之常
材有千載之榮遇錄四方奔走之效記兩朝夙夜之勤
采子方哀馬之言彤漢宣求劍之意倍推恩於前奏俾
歸節於上臺幸及桑榆之陰再登鷓鴣之序儻或全於
危仆誓更竭於樸忠俯倭彷徨期於得請

蔡州到任謝上表

臣某言伏奉勅命就差臣判蔡州單州事仍放朝辭敢
便路發赴本任臣已於今月二十七日到任上訖垂死
餘息特許生還陪京近藩仍容卧治再造之賜九殞莫
酬中謝伏念臣謬忝執文妄十仕進先帝臨軒之際獨
首於六科陛下出閣之初最先於諸傳每惟際會敢不

矜修其如資性庸駑賦分蹇薄雖聖君哀其拙直而多
士嫉其愚狂出入兩朝當官者四十餘載周旋萬里典
民者一十五城夙夜在公固鬼神之可諒進退維谷寔
孤子之無依嚮者終入三司始踰數月屬河湟旅拒閉
輔繹騷首得戎麾往填邊瑣肇謀器備創設規模經始
關防召募軍旅居則飲食無暇出則晝夜兼行本先固
圍之謀冀成長戀之馭其如象譏罕合物論易喧朝廷
切於平允措紳惜其殫費所以未能出師隴首飲馬河
源盡阮豺狼高築京觀以致對分將閫遠戍邊屯冒暑
中乾飲泉內冷藥石無效支體將隳唯力疾以臨戎誓
捐生而報主式違例罷就委藩條方敢自陳仰旬餘喘
伏遇尊位皇帝陛下仁深念舊德務含生察三載之勤
勞辨多言之虛實念臣年光老暮知臣蹤迹單危深惻
上仁俾遷中豫京畿頗近醫診易逢僮或稍駐桑榆未
填溝壑誓竭狗馬之效仰答天地之私

乞守舊官表

右臣昨再上章乞守舊官就移汝蔡養疾今蒙聖恩移判蔡州已奉表上稱謝訖所有乞守舊官仍奉朝詩者三歲終更方求鑿於便郡萬錢賦祿尚均寵於近司深自憂惟不違啟處伏念臣出於寒緒幸會昌期偶緣歲月之勞叨塵文武之任以小羌旅拒西鄙繹騷特換戎旃徃填邊蹟仰貪誤選曾不固辭謂天幸可以橫途謂戰功可以妄立歲時驚過誅納無聞仰荷寬恩止從例罷爰以飲泉感疾伏枕踰時形容已枯支體將廢命輕恩重既報國之未終福過災生固微榮之可畏以是懇祈舊職望改近藩冀遂養頤或蘇朽瘁伏遇尊位皇帝陛下曲矜老暮深憇勤勞中豫名區已更於郡組无戎重器尚假於戎麾矧乃宣徽使名所以表率諸將節制祿賜所以宴犒三軍當羌事之未平顧經費之滋廣若以拓邊之寵猶私卧治之臣深屈至公豈容虛受望並俞於前請庶克濟於餘年夢寤徬徨仰俟開可

許州到任謝上表

臣某言伏奉勅命差赴本任已於今日二十五日上訖
出自保全伏增感泣中謝竊念臣人品駑下世緒寒微
事國四十餘年臨民十有五郡言行無取政化靡聞空
度歲時動成嗤鄙策勵之心徒切頑闇之稟莫移昨以
守塞終更頻淮養疾求還使節未奉俞音蒙降侍醫僅
存殘喘日慙厚祿內訟無功安敢萌心更欲希進不圖
驛傳猥賜詔函職尚備於藩侯地又遙於退瑣敢稽召
節預述無能爰夙駕以載驅將晨趨而漉歎有煩公議
合寘簡書一則臣嘗假戎麾首圖羗事三周歲籥四改
軍屯惟竭慮以保邊靡出師而盡敵一則臣久從外補
罕遇時英或但採於風聞未深諒於衷悃分甘棄置式
儆庸愚伏遇尊位皇帝陛下祭臣樸忠念臣孤苦以遽
申於避遜况匪自於干祈力辨群言聽還本任望宸居
而至邇瞻幄座以無由傷弦之感自多淪髓之思難叙
都門迴首兩涕交頤敢不深務省循永懷兢畏更勵當
官之節上酬哀老之仁

亳州到任謝上表

臣某言蒙恩就差知亳州軍州事。今月十四日到任。上
訖辭繁就逸。冀保於阽危。竭志服勞。未疇於再造。深自
惟忖。詎敢違寧。中謝伏念。臣少失父。兄長無師。友守簡
編。之陳迹。昧臺閣之遠猷。謂委分可以率天真。謂互躬
可以成世務。獨任蹇短。動至顛躋。一昨罷使洛郊。卧疾
蒲阪。懇祈中豫。就訪良醫。幸殘喘之偶存。實榮望之都
絕。不圖星使忽降。芝函敢稽。就日之行。仰廢出綸之旨。
豈謂都門始入。遽隔中參。詔字未乾。亟還本任。矧惟舊
許。實首近藩。控亭傳之要途。多衣纓之貴胄。漂流之際。
間隙易乘。在渙汗之尚還。何飛條之難集。式屬近臣。致
政便郡。瀕淮老物。可憎儻知慙。而匿迹來寵。將授或觀。
遇以回心。爰布懇私。上祈開可。伏遇尊位皇帝陛下。哀
矜卹下。仁慈好生。察群議之忠邪。照物情之真偽。幽枉
斯達。務昭責實之明。窮蹙可憐。特徇換州之請。載惟渴
渙之下。適當湟潦之餘。敢不修謹。米鹽繕完。圖籍勵傷。

摧之晚節蘇震悸之羈魂永罄消誠仰驕天庇

河中府到任謝上表

臣某言伏奉勅命就差判河中軍府事今日二十日到任上訖十月期歸將終遠戍三年更盡獲改列城仰荷保全敢忘循省中謝伏念臣本階平進逮事兩朝攀仕塗者四十春陪時政者十五祀大勞雖闕薄效粗陳嚮者六載徂東班條蓋久八月主計座席未遑亟自省闡出分將鉞軍屯屢改年籥四遷徒歷險艱未殲蠹戾又以謀皆鑿空事或創圖利遠效遲望輕人嫉多言全涌沮議叢興每下列章尚寬薄責彌深策厲冀塞矜容由是寢食外虧精爽中耗毒炭熏目雙瞳斗昏邊風切肌兩臂將廢懼戎謀之闕間常力疾以治戎夙夜在勤人神可諒矧惟閭外之得失寔繫天下之安危一毫或差九殞焉贖儻便文而自衛固罔上以非忠况復功名良繫運命援臂不耦必難立於乃勲虎頸飛行將有待於采者是以常布危歎莫解劇權伏遇尊位皇帝陛下從

欲象天寶慈體道卹繇戍之憂若察臣下之艱因分
 道以更張俾班條而得請穿楊善止雖謝於前勞有杖
 勤歸差安於衆聽儻進鍼艾之益稍扶蒲柳之衰誓屬
 右橐重趨絕塞庶成來效仰答大恩

欽定四庫全書

文莊集卷七

表

宋夏竦撰

辭資政殿大學士表

臣某言某月日三班奉職龐顯到州伏蒙聖慈賜臣勅
 牒一道官誥一道特授臣依前本官充資政殿大學士
 及准中書劄子奉聖旨賜臣對衣金帶鞍轡馬思惟圖
 舊詎可妄要賞異及勞豈容虛受虔瞻出綉媿極無顏

臣某誠惶誠懼頓首頓首伏念臣本以孤生誤攀雋軌
頃由端右出揔戎機儒服治兵易騰於衆誹丹誠許國
惟誓於明祇而繼戍經郵嘗嬰疾癘晝則力疾備寇夜
則丸艾灼膚矧夫義重於生固知死且不朽委形骸於
馬革等性命於鴻毛初無片言曾旬餘喘終更三歲罷
守一麾視事踰時中乾卧病累旬不起九殞是濱况迺
萍津計居內地別無戎羗之禦遂祈汝蔡之遭蒙降侍
醫奔採沈瘵儻未鄰於萬鬼誓復守於三邊昨茲春夏
之交獲逢鍼石之益尚聞外警臨遣輔臣爰拜露章請
陪邊候但以于蕃之僻左未知異俗之懷來遽煩思私
過極褒寵伏見朝廷待下賞勸從宜臣子立身出處有
禮病不任事則請告營醫疾既有瘳則首公復棄顧無
可錄是惟厥常又念前春常膺詔召官有擁旄之重禮
無俟駕之行不敢豫拜封章力避賢路洎還舊許方悞
顛蒙職臣寡謀累國傷體尚蒙寬宥特追簡書而况今
者竊處近城宴安自逸求備邊瑣跬步未前儻不懇辭

更貪異渥固當自訟何待人言此者伏遇尊位皇帝陛下躬奮乾剛布昭天律濬發明詔洞判忠邪登用正人助分枉直陶唐之聖護說虞舜之祭通言臣方敢備列危衷乞還成命庶獲全於晚節更免遂於前非詎敢飾情自昧丹臆

謝授資政殿大學士表

臣某言今月十二日准樞密院馬遞到詔書一道以臣所上表為曾乞邊任蒙除資政殿大學士及有恩賜不

敢當受陳乞宜不允者人言可畏寔駭虛弦天聽蓋高靡收渙汗載揆官閣罔措心顏臣某中謝洪惟先朝經始內殿敞訪對之地謹脩問之負擇人甚艱其職多闕臣齒髮空悴績效靡章遭值聖時叨竊榮祿出入宰屬塵點皇僚豈宜無功更冒清選而況向者邊書挿羽邏騎具裝秦隴威兵鄠雍謀帥本朝以年輩最舊勤拙粗施擢於計廷付以戎警力小負重自見甚明就約詳危臣節安在內惟策厲誓首險艱四改師屯三周歲籥羌

事圖上必深料於安危王師務全敢挑取於功譽終更
罷戍感疾營醫方勻近城以抹沈瘵不圖詔檢促覲宸
居權輿識工據南敢辨季長辭銳飾貌難申省咎歸塗
逃形近邑監司按其粟錯都鄙陳於平條詩會餘賦之文
簡凝含醜之墨寓趾泮水之罇側身攢羽之衝分沈死
灰趣畢殘喘伏遇尊位皇帝陛下宣精百度觀象九乾
剛健博臨高明廣照深惟累洽之盛宜杜私黨之萌或
宗杜阻憑干於衆憤則郊廟對越契於神歡中發芝函
誕告鵷序開悛止之路戒澆競之風俾棄私於所天當
首公於王室三辰增煥六合頓清人祇阜安道路鼓舞
復我釀化曾不崇朝臣方敢自上疾瘳請還邊候函瞻
出綽之訓翻詒躍治之羞况夫媿汗未乾悸膽猶破苟
遂非於覆轍必騰誚於刑章爰叙憂兢祈寢褒進仰承
日月之鑒俯哀螻蟻之心延登正人訪建公論諒臣孤
立察臣前勞觀靡盬之篇采勤歸之義詔馭幸之柄圖
勸後之恩敷諭至明拜授斯寵忠臣共慰旅魄交寧期

報德於萬分誓捐生於百世感極惟涕陳叙罔周

河南府到任謝上表

臣某言伏奉制命差判河南府兼西京留守司公事已於今日九日到任訖偏陪五府歷守三都逢辰之榮曠古無並臣中謝伏念臣人品至下門緒素寒孤苦一生迺遭萬狀歲月邁如郵置筋力困於泥塗謀已弗減舉世詒誚往歲召於中豫入長近樞昧遜讓於時賢寔格廢於成命間者起自渦曲往帥晉陽嘗面對於邇顏乞

永從於外補懼以危迹復玷清時不圖再歲之間忽補鼎司之闕遠遷右府逮越周星掌虎旅之伍符豈龍韜之聖略雖矍鑠而自勉終邇坎以難工朝多正人日有公議煩黃屋之掩蔽辱丹床之辨明脩位無顏謝負何地而况鉅賢讓爵哲士辭榮晏然自安亦不知避尚賴伏遇尊位皇帝陛下察臣闇懦止是顛愚愍臣憂勞別無他累力排時論敷告外廷進秩師垣均勞洛邑俾其休逸保乃衰殘息偃無營冀漸生於解肉責望不及將

永脫於風波誓輸樂職之勤仰矜衰老之惠瞻望闕廷
臣無任戴天荷聖激切屏營之至謹奉表稱謝以聞臣
某誠榮誠感頓首頓首

孟州到任謝表

臣某言伏奉勅命赴孟州本任於今月二十一日上訖
班寬大之詔存拊吏民歌中和之詩祇見叅佐勉屬衰
朽少謝矜憐臣某中謝伏念臣蚤以諸生幸逢清世勤
榮四紀險易一心筋力困於泥塗髀肉消於亭隧迄無
織效紀在本朝昨以竊位樞廷均勞洛宅寵冠九域地
首三都太高則危暴長將折而况驛傳至遠迎勞尤艱
屬本鎮之缺官爰露章而布款伏遇尊位皇帝陛下寶
慈體道求舊敦仁老馬力殫靡忘前效傷禽膽破知避
虛弦時允三城之求俾紓四體之責然而據河山之要
控魏晉之衝右多重兵代委名將方今祖庾至闕閭里
尤虛浮梁有舉莛之役長隄乏為楫之備生以馭福寔
銜佚老之恩職思其憂敢忘匪躬之節唯期夙夜仰答

照臨

辭兼侍中表

臣某言今月十八日姪女婿權國子監主簿高直溫到西京伏蒙聖慈賜臣制命官誥特授臣依前檢校太師兼侍中仍加食邑寔封者擁旄本鎮已俯遂於厥誠參乘束臺寔迥踰於初望聞命震恐啟處不遑臣某中謝伏念臣近以衰殘迫於迎勞求還近便之任止避曠殆之愆向或所鎮並邊郡將無闕稍涉毫芒之幸敢萌遷徙之求况在前章脩陳丹款寔無一字少飾片言其或外叙衰殘內懷希覲有覲顏面更睹士流設道典刑當有陰罰不圖聖眷遠錫制恩若以念舊均慈則臣累官已重若以疇勞第賞則臣宣力無成伏况朝廷要官批取者難久天下公議巧避者愈彰儻詔有隨之深譏將累程車之善止此者伏遇尊位皇帝陛下慎徽百度精汰庶官賞必計功祿無廢德矧迺納言之重當圖汗馬之勞豈容蒲柳之衰更竊金貂之賜伏望陛下哀臣介

拙愍臣憂危時寢異思聽守前職垂儲儲之獎庶無責
於時賢伐坎坎之輪免有妨於來寵誓堅廉讓之節仰
疇覆露之仁

謝授兼侍中表

臣某言今月二十二日伏奉詔命以臣所上表蒙恩特
授檢校太師兼侍中乞守舊官不許辭者芝函睿札諭
青於十行蟬冕要官升華於一品顧茲非據何但若驚
臣耳中謝伏以叅乘東臺納言內幄訪延睿政出納大
猷制爵至崇兼官尤重或以尊懿戚或以馭戰功近世
儒臣罕得超授如臣者材品至下門地素寒偶階片文
仰會先聖冠制策之親選預東禁之精求夜寐夙興更
中外者四紀興利除害貫險易而一心若乃賡漢右餓
殍四十五萬餘口屏江西巫覡一千三百餘家屢承綸
綍之褒頗首循良之寄伏遇尊位皇帝陛下重暉繼照
求舊推恩擢叅垂箔之近班寔罄戴君之亮節泊乃海
隅聚寇責以救寧閔內治兵委之經畫偶無愆素粗得

全師聖念疇勞君長樞府又以并汾帥滿起付戎輅趙
魏卒驕就更邊戍載嚴單律稍契前籌宸慈記功命亞
台席終以久供外役罕接雋游靡卹寸長務責全德一
則以聚羌遠塞是臣盡敵無能一則以兩土中都乃臣
治邊所召乞放還於舊任洎追返於渙恩上賴陛下諒
臣樸忠愍臣窮蹇力排羣議持道簡書斷自穆績裁諸
宥密傷摧是悼矍鑠何堪尋蒙進秩師垣均勞洛宅而
又密塗交會右族盛強寘法未能廢刑豈敢至有誣其
加筮構以凭輿復賴保全為臣辯雪再念臣本鎮甚迹
郡將未除爰叙艱危求換繁劇得請之日被賜已綵如
脫樊籠頓解韁鑠豈謂游頌明制誤賞無功補外常儀
靡諧於三讓發中溫詔促預於七車敢不策厲羸軀矜
持晚節畢桑榆之暮齒答穹厚之鴻私

謝男安期加職表

臣某言伏蒙聖慈特授臣男安期寵圖閣直學士知渭
州者公朝誤賞私室叨榮言念衰遲豈勝感慰臣某中

謝伏念臣族本寒緒世無顯官闕食采之舊封陞滿籛
之前訓屬公台慎選之日實縉紳精汰之辰黃髮何堪
視維師之隆器賤息無算遷內閣之近僚繼承優假之
私豈殊前後之拜此蓋伏遇尊位皇帝陛下睿明稽右
信厚記功以為造武公之衣周王所以旌善職封降戎
之檄漢帝所以顯忠臣斷自止心既茲寵爵賞延于世
既橫被於恩榮義重於生誓共期於報塞

